


LOLENGE OYO MWANJE AYAKI

EPAI NA NGAI, PE ETINDA NA YE

 Pe ntango mosusu bandeko bazali...Nazali komona manietofóni ebele awa, na ntembe te, bakokotisa yango na ba-bande. Ntango nyonso okolinga koyeba mpenza oyo Molimo Mosantu alobaki na bino, okutana na bandeko oyo bazali na manietofóni oyo, bakoki kozongela kobeta bande yango, okokoka koyoka likambo na yo malamumu. Landela yango pe tala soki ekosalema te mpenza ndenge Alobaki yango, omoni. Soki oyoki yango koloba “YANGO ELOBI NKOLO, ‘Likambo moko boye, to *oyo* ezalaka *boye*,’” to tala yango mpenza na bokebi pe tala soki ezali bongo to te. Omoni? Ezalaka ntango nyonso ndenge wana.

² Sikawa, mpo na kopesa bino likanisi. . . Pe nazali na mwa esengo na mpokwa oyo ndenge tozali bobele mwa bato moke. Tozali bobele biso na biso, boye te? Tozali na bapaya te, moko te kati na biso. To. . . Nakoki bongo kosalela elobeli na ngai ya Kentucky pe nakomiyoka mpenza malamumu, mpo ete tozali—tozali bobele. . . Pe nalobi yango te mpo na kotiola Kentucky, soki moto moko ya Kentucky azali awa. Moto moko ya Kentucky azali awa? Tombola loboko. Tala! Nasengeli mpenza komiyoka malamumu, boye te? Ezali malamumu mingi.

³ Mama na ngai azalaki kosala na mbola moko. Mokolo moko nakendeke kuna mpo namona. . . Mibali mingi bazalaki kofanda kuna, pe mesa moko ya monene pe molai etiamaki kuna. Pe nalobaki: “Boni bazali awa oyo bauti na Kentucky, batelema.” Bato nyonso batelemaki. Nakendeke na ndakonzambe na mpokwa wana, na losambo na ngai, pe nalobaki: “Boni bazali awa oyo bauti na Kentucky?” Bato nyonso batelemaki. Bongo nalobaki: “Ee, ezali malamumu mingi.” Bapalanganisi Nsango basali mosala malamumu, boye tozongisi matondi mingi mpo na yango.

⁴ Sikawa, na Mokanda na Baloma, mokapo ya 11 pe molongo ya 28. Boyoka na bokebi sikawa botangi ya Makomi.

Na nzela na Nsango Malamumu, batangami bayini na Nzambe mpo na bino, kasi na nzela na koponama, bazali balingami ya . . . mpo na bankoko.

Zambi makabo na Nzambe pe kobiangama na ye ikobotolama te.

⁵ Tobondela. Nkolo, sunga biso sikawa na mpokwa oyo wana ezali biso kobelema na likambo oyo na limemia, na motema mobimba, na bosembo, ezali bobele mpo na nkembo na Yo nde

makambo oyo ezali kolobama. Sunga ngai, Nkolo, tia kati na likanisi na ngai bobele makambo oyo esengeli kolobama pe boni nasengeli kolobela yango. Kanga monoko na ngai soki ngonga na Yo ekoki. Nasengi ete motema moko na moko eyamba makambo oyo mpo na bolamu ya bato na bokono pe ya bosenga oyo bazali na liyangani oyo. Mpo nasengi yango na Nkombo na Yesu Klisto. Amen.

⁶ Sikawa, nalingi kobanda likambo oyo mpenza wana ezali biso moke. Pe—pe nakomeka kosala ete naumisa bino ntango molai te, nakotia sáa na ngai awa pe nakosala nyonso mpenza oyo natika bino bokende na ntango malamau na ntina ete bokoka koya lisusu lobi na mpokwa. Sikawa, bozala kati na mabondeli. Nandimi te ete mwana na ngai ya mobali akaboli ata bakalati ya mabondeli. Natunaki ye te soki a . . . Pe soki bakabolaki yango te, to ezala ata bakabolaki yango to te, ekosala eloko te. Tozali na bakalati awa ata boni soki tosengeli kobenga ndambo na bato. Na bongo, soki te, boye, tokotala bobele oyo Molimo Mosantu akoloba.

⁷ Sikawa, soki bolingi koyoka na bokebi. . . Sikawa, oyo ekoki . . . lokola na . . . Tozali bobele mwa moke awa, ezali ntango oyo elongobani mpo na koloba likambo oyo, mpo ete e—etaleli bomoi na ngai moko. Pe yango nde ntina natangi Likomi oyo na mpokwa oyo, mpo bokoka komona ete makabo pe kobiangama ezali te oyo moto akoki kozua na makoki na ye.

⁸ Polo oyo azalaki koloba awa, alobaki: “Bayuda, kolandana na Nsango Malamau, babomamaki miso pe bazalaki mosika na Nzambe, yango, mpo na biso.” Kasi kaka molongo oyo ezali liboso na yango, elobi: “Yisalaele mobimba bakobika.” Yisalaele mobimba bakobika. Mpo na oyo etali koponama, Nzambe Tata alingi bango pe abomi bango miso na ntina ete biso Mabota tokoka kozua nzela na kobongola motema sikawa, mpo, na nzela na Abalayama, Momboto na ye ekoka kopambola mokili mobimba yengebene na Liloba na Ye. Omoni ndenge bokonzi na Nzambe ezalaka? Liloba na Ye esengeli bobele kokokisama. Akoki ata kozala ndenge mosusu te. Pe sikawa biso, na . . . Nzambe aponi biso; Aponi Bayuda; pe A . . .

⁹ Oyo nyonso ezali nde boyebi makambo liboso ya Nzambe. Ntango Asakolaki makambo yango, oyo elingaki kosalema, Ayebaki yango liboso. Nzoka nde, Nzambe, mpo azala Nzambe, na ebandeli Asengelaki koyeba suka, soki bongo te mbele Azalaki te Nzambe oyo azangi suka. Nzambe alingi te ete bamosusu babeba. Soko moke te! Alingi te ete moto moko abeba. Kasi na ebandeli ya ebandeli ya mikolo, ya—ya mokili, Nzambe ayebaki na bolamu nani alingaki kobikisama pe nani alingaki kobikisama te. Alingaki te ete bato babunga, “Ezali mokano na Ye te ete bamosusu babunga, kasi ezali mokano na Ye ete Abikisa bato nyonso,” kasi Ayebaki uta na ebandeli nani alingaki kobikisama pe nani alingaki kobikisama te. Yango nde ntina

Akokaki koloba liboso: “Likambo *oyo* ekosalema. Likambo *wana* ekosalema,” to, “*Oyo* ekozala *bongo*. Moto *sóngóló* akozala *boye*.” Omoni?

¹⁰ Akokaki koyeba yango liboso mpo ete Azali na suka te. Soki oyebi oyo yango elingi koloba, ezali bobele ete, “Azangi koyeba ata eloko moko te.” Omoni, Ayebi. Ee, ezali na eloko moko te liboso ete ntango ezala, to nsima, wana ntango ekozala lisusu te, bomoni, ata na ntango wana Ayebi bobele makambo nyonso. Makambo nyonso ezali kati na makanisi na Ye. Pe na bongo lokola Polo alobaki na Baloma, mokapo ya 8 pe ya 9: “Bongo mpo na nini asilikelaka bato?” Na bongo tomonaka yango, kasi Nzambe. . .

¹¹ Lokola likambo ya koteya Nsango Malamu. Moto moko alobaki: “Ndeko Branham, ondimaka Yango?”

Nalobaki: “Tala.”

Alobaki: “Osengeli kozala Calviniste.”

Nalobaki: “Nazali Calviniste ntango nyonso oyo Bocalvinisme ekozala kati na Biblia.”

¹² Nzoka nde, etape moko ezali na Nzete yango, ezali nde bo-Calvinisme, kasi bitape mosusu pe ezali na Nzete yango. Nzete ezalaka na etape bobele moko mpamba te. Alingaki bobele komema yango kino na Kobatelama ya Seko, kasi nsima na mwa ntango bakatisi kino na bo-Universalisme pe babimi kuna na esika moko boye, ezali lisusu na suka te. Kasi ntango okómi na suka ya bo-Calvinisme, zonga nsima pe banda kolanda bo-Arminianisme. Bomoni, etape mosusu ezali na Nzete yango, pe etape mosusu lisusu na Nzete yango, koba bobele kokende. Lisanga ya nyonso wana nde esali Nzete yango. Boye nandimi bo—bo. . . Calvinisme na ntango nyonso oyo ezali kouvemela kati na Makomi.

¹³ Pe nandimi ete Nzambe ayebaki liboso na kozalisama na mokili, Aponaki Lingomba na Ye kati na Klisto, pe Abomaki Klisto liboso na kozalisama na mokili. Makomi elobi bongo: “Azalaki Mwana-na-mpate ya Nzambe oyo abomamaki liboso na kozalisama na mokili.” Bomoni? Pe Yesu alobaki ete Ayebaki biso liboso na kozalisama na mokili, Polo alobaki ete “A—Ayebaki biso pe Akanaki liboso mpo na biso ete tozala bana na Ye kati na Yesu Klisto liboso kutu mokili esalema. Yango nde kozala Nzambe. Oyo wana nde Tata na biso. Bomoni?”

¹⁴ Na bongo bomitungisaka te, nyonso ezali kotambola na ndenge elongobani, eloko na eloko ezali kosalema mpenza na ntango na yango. Likambo bobele moko, ezali nde, okota kati na botamboli yango. Pe oyo wana nde oyo wana nde likambo malamu mpo na yango, na ntango wana nde okoyeba ndenge nini osala, wana ezali yo kokota na botamboli yango.

¹⁵ Sikawa, tala malamu sikawa: “Makabo pe kobiangama ikobotolama te,” yango nde nzela bobele moko oyo nakokaki—nakokaki, yengebene na Makomi, kokokanisa kobiangama na ngai kati na Nkolo. Pe nabanzi ete na mpokwa oyo nazali elongo na baninga oyo bakososola yango solo pe oyo bakokanisa te ete ezali likambo ya ngai moko, kasi mpo bokoka kozala na lisosoli pe koyeba mpenza oyo—oyo Nkolo alobaki ete Akosala, komona eloko moko kotambola, kolanda yango pe kokota na kati na yango.

¹⁶ Boye, na ebandeli, eloko ya liboso oyo nakoki mpenza komikanisela ezali nde emononeli. Eloko ya liboso oyo nakoki kokundola na makanisi na ngai ezali nde emononeli oyo Nkolo apesaki ngai. Mibu ebele, ebele esili koleka, nazalaki mwana-moke mpenza. Pe nazalaki na libanga na loboko na ngai.

¹⁷ Sikawa, nasengi bino bolimbisi, nakoki komikanisela eleko oyo nazalaki kolata mokoto ya molai. Nayebi te soki yo (to nani kati na bino) oyo okoli na ndenge ekoki ozali komikanisela eleko oyo bana mike ya mibali bazalaki kolata mikoto ya milai. Boni awa bazali komikanisela eleko oyo bana mike bazalaki kolata, iyo, mikoto ya milai? Ee, nakoki komikanisela, na mwa ndako na biso ya kala epai tozalaki kofanda, nazalaki konguluma na mabele. Moto moko, nayebi te soki ezalaki nani, akotaki. Mama atongáká mwa—mwa eteni ya elamba ya langi ya bule likolo na mokoto na ngai. Naino nayebaki mpenza kotambola te. Kasi na eleko wana nazalaki konguluma, natiaki mosapi na ngai na matandala oyo ezalaki na makolo na bango, pe nazalaki kolia matandala uta na lokolo na ye wana etelemaki ye pene na litúká, mpo na koyotela móto. Namikaniseli ete mama na ngai atombolaki ngai mbálákáká mpo na yango.

¹⁸ Bongo likambo oyo elandi oyo nazali komikanisela, esengelaki kozala pene na mibu mibale nsima na yango, nazalaki na libanga moko ya moke. Nakómaki pene na mibu misato, pe leki na ngai ya mobali na ntango wana naino akokisaki mpenza mibu mibale te. Pe na bongo tozalaki na nsima ya lopango na esika ya kopasola nkoni epai bazalaki komema nkoni pe kopasola yango. Boni bazali komikanisela eleko wana, ntango bazalaki koya na nkoni na nsima ya lopango pe kopasola yango? Mpo na nini nalati ata kalavati na mpokwa oyo? Na—nazali mpenza epai na biso moko.

¹⁹ Bongo ntango ba...Kuna na esika ya kopasola nkoni moluka moko ezalaki kotiola kuna, kouta na liziba. Tozalaki na etokeli ya ekútu ya kala kuna na liziba, epai tozalaki kotóka mai na biso pe kosopa yango na katini ya kala, katini ya libaya ya sedre, pe komema yango.

²⁰ Namikaniseli mbala ya suka oyo namonaki mobange ya nkoko na ngai ya mwasi liboso ete akufa, azalaki na mibu mokama na zomi. Pe ntango akufaki, namemaki ye na maboko

na ngai pe nasimbaki ye boye, mpenzampenza liboso ete akufa. Azingaki ngai na maboko na ye, pe alobaki: “Nzambe apambola molimo na yo, molingami, sikawa pe libela na libela,” ntango akufaki.

²¹ Pe nandimi te ete mwasi yango azaláka ata na—na sapato na ye moko, na bomoi na ye mobimba. Namikaniseli ete nazalaki kotala ye, pe ata ntango nazalaki elenge, nazalaki kokende kotala bango, ntongo nyonso azalaki kolamuka, makolo ngulu, azalaki kotambola likolo na matandala wana kino na liziba, kotóka katini ya mai pe kozonga, makolo na ye na kati na yango mpenza. Na bongo etungisa bino te, aumelaki kino mibu mokama na zomi. Na bongo (iyo, misie) azalaki pe mpenza, mpenza makasi.

²² Boye namikaniseli ete alingaki kobetela ngai lisolo ya babíle ya tata na ngai oyo azalaki kosakana na yango ntango azalaki mwana moke. “Mobange ya boye,” namilobelaki, “akosala ndenge nini mpo na komata na ebombelo wana?” Mwa ndako ya kala na biteni mibale, pe ezalaki na ebombelo na likolo. Bakataki nzete mibale ya mike, pe basalaki na yango ebuteli, mpo na komata kuna. Ee, nalobaki. . .

²³ Ee, bongo, alobaki: “Boye, nsima na kolia nakoyebisa yo, nakolakisa yo ba—babíle ya papa na yo.”

Pe nalobaki: “Malamu.”

²⁴ Na bongo alingaki kolakisa ngai yango, kati na sanduku moko kuna na likolo esika abombaki biloko na ye ndenge mibange basalaka. Pe namilobelaki: “Mobange ya boye akosala mpenza ndenge nini mpo na komata na ebuteli yango?” Na bongo napusanaki wana pe nalobaki: “Nkoko,” nalobaki, “zela moke, molingami, nakomata awa mpo nasunga yo.”

²⁵ Alobaki: “Telema mpembeni.” Amataki nokinoki na ebuteli yango lokola eséndé. Alobaki: “Kasi, yaka te!”

Pe nalobaki: “Malamu, Nkoko.”

²⁶ Namilobelaki: “Ólalá, soki nakoki mpenza kozala bongo, kozala naino na makasi bongo kati na ngai na mibu mokama na zomi!”

²⁷ Na bongo, lisusu namikaniseli ete nazalaki na mwa liziba wana, nazalaki na libanga pe nazalaki kobamba yango boye, na potopoto, nazalaki komeka kolakisa leki na ngai ya mobali ndenge nazalaki makasi. Pe ndeke moko efandaki likolo ya nzete pe ezalaki koyemba, kopumbwapumbwa, mwa endongendonge na tolo motane to ndeke moko ya lolenge wana. Pe, mwa endongendonge yango, nakanisaki ete ezalaki koloba na ngai. Nabalukaki mpo na koyoka, pe ndeke yango epumbwaki pe ekendeki, bongo Mongongo moko elobaki: “Okolekisa eteni monene ya bomoi na yo pene na engumba moko ebengami New Albany.”

²⁸ Ezali na ntaka ya milles misato [5 km—N.D.T.] longwa na esika nabokolama. Pene na mobu moko nsima na yango, tokendeke na esika yango, tozalaki ata na likanisi te ya kokende. . . New Albany. Na bomoi na ngai mobimba, ndenge makambo wana. . .

²⁹ Nzoka nde, tala, bato ya libota na ngai bazalaki basambeli te. Tata pe mama na ngai bazalaki kokende na ndakonzambe te. Liboso na yango, bazalaki Bakatoliko.

³⁰ Mwana ya ndeko na ngai oyo afandi awa na esika moko boye na mpokwa oyo, nabanzi, nayebi te. Azali soda. Nazali kobondela mpo na ye. Ye pe azali Mokatoliko, azali naino Mokatoliko. Pe lobi na mpokwa, ntango azalaki awa pe amonaki makambo oyo Nzambe asalaki, azalaki mpenza wana na etumbelo. Alobaki, azalaki wana, pe alobaki: “Noko Bill?” Afandaki ntango molai na mikili mosusu, alobaki: “Ntango namonaki yango. . .” Alobaki: “Oyo wana e—esalemaka na lingomba Katoliko te.” Alobaki: “Oyo wana. . . Na—nandimi, Noko Bill, ete olongi,” alobaki bongo.

³¹ Na bongo nalobaki: “Molingami, *ngai* nde nalongi te, Ye nde alongi. Omoni, *Ye* nde alongi.” Pe na bongo alobaki ete a. . . Nalobaki: “Sikawa, nasengi na yo te ete osala soki nini, Melvin, kasi bobele ete osalela Nkolo Yesu Klisto na motema na yo mobimba. Okoki kokende esika nyonso olingi. Kasi yeba na ntembe te ete kati na motema na yo Yesu Klisto abotami lisusu, omoni, kati na motema na yo. Na ntango wana okoki kokende na lingomba nini olingi, nsima na yango.”

³² Bongo, kasi bato oyo bazalaki liboso na ngai bazalaki Bakatoliko. Tata na ngai azalaki Irlandais pe mama na ngai azalaki Irlandaise. Moto bobele moko oyo azalaki na makila ya ba-Irlandais te, ezali nde nkoko na ngai ya mwasi oyo azalaki Indienne Cherokee. Mama na ngai azali mpenza lokola metis. Na bongo ngai. . . mpo na ngai, ezali. . . libota na biso, nsima na mabota misato, esili kolimwa. Kasi bobele ye nde azalaki Irlandaise te na bokitani mobimba, nkombo na bango ezalaki Harvey pe Branham. Pe liboso na ye Lyons nde azalaki, ye pe azalaki Irlandais. Pe bango nyonso bazalaki Bakatoliko. Kasi ngai moko, babokolaki biso na losambo to na malakisi ata moko te, ntango tozalaki bana.

³³ Kasi makabo wana, bimononeli wana, nazalaki komona bimononeli na eleko wana pelamoko nazali komona yango lelo, ya solo, mpo ete makabo pe kolangama ikobotolama te. Ezali nde boyebi liboso ya Nzambe, Nzambe nde azali kosala likambo. Na bomoi na ngai mobimba nazalaki kobanga koloba ata nini na ntina na yango.

³⁴ Bosila kotanga lisolo na ngai kati na mwa buku moko ebengami *Yesu Klisto Azali Motindo Moko Lobi, Lelo, Pe Libela*. Nabanzi ezuami kati na babuku mosusu, oyo mosusu. Boye

te, Gene? Ezuami kati na oyo, buku oyo ya momeseno—ya momeseno, kati na—kati na buku oyo tozali na yango sikawa? Ezali yango, *Lisolo ya bomoi na ngai*? Nabanzi ezali yango. Na bongo ntango to. . . Ezali ndenge, boye te? Babuku na ngai moko, kasi ngai moko, natanga yango ata mbala moko te. Kasi moto mosusu nde akomaka yango, bongo ezali bobele biloko oyo bamemaki na liyangani. Makambo oyo wana nasila kobikela yango, na bongo nazali ntango nyonso koluka ete makambo mosusu esalama. Na bongo, ezali malamumu, nasili kotanga biteni na yango, ndambo awa ndambo kuna, bobele ntango nazali kozua libaku.

³⁵ Bongo, na ndenge nyonso, ntango nazalaki—ntango nazalaki mwana moke, boyebi ndenge emononeli elobelaki ngai, nazalaki penepene na mibu nsambo, pe elobaki: “Komela masanga to makaya te, to pe koyeisa mbindo na nzoto na yo te ata na lolenge moko te, okozala na mosala moko ya kosala ntango okokola.” Pe boyokaki yango ndenge elobami na buku. Ee, ezali bongo. Ekobaki kokómela ngai ntango nyonso.

³⁶ Ntango nakómaki moteyi, ee, na ntango wana nde na ntango wana nde ebandaki mpenza kokómela ngai ntango nyonso.

³⁷ Mokolo moko na butu namonaki Nkolo na biso Yesu. Nazali koloba yango na ndingisa, nabanzi, ya Molilo Mosantu. Mwanje na Yawe oyo ayaka epai na ngai Azali Nkolo Yesu te. Akokani na Ye te kokokana na emononeli wana. Mpamba te, na emononeli oyo namonaki na ntina na Nkolo Yesu, Azalaki Mobali na nzoto mike. Azalaki te. . . Nakendeki na esobe, kobondela mpo na papa na ngai. Nazongaki, napusanaki mpembeni na mbeto, na butu wana natalaki ye pe na—nalobaki: “E Nzambe, bikisa ye!”

³⁸ Mama na ngai asilaki kobikisama pe nasiláká kobatisa ye. Bongo namilobelaki: “Oo, papa na ngai amelaka mingi.” Pe namilobelaki: “Soki nakokaki bobele komema ye ete andimela Nkolo Yesu!” Nabimaki, nalalaki na mbeto ya kala oyo ezalaki na eteni ya liboso, pene na ekuke.

³⁹ Eloko Moko elobaki na ngai: “Telema.” Natelemaki, nabandaki kotambola, pe nazongaki na esobe oyo ezalaki nsima na ngai, esobe ya matiti.

⁴⁰ Pe kuna, na ntaka ya pieds koleka zomi te [metele misato—N.D.T.] uta esika nazalaki, Mobali moko atelemaki wana; Alataki elamba ya mpembe, Moto na nzoto mike; Akangaki maboko na Ye *boye*; Azalaki na mandefu mwa mokuse; suki kino na mapeka na Ye; Azalaki kotala epai mosusu longwa na esika nazalaki, *boye*; Azalaki kotalisa boboto. Kasi nazalaki kososola te, ndenge makolo na Ye ezalaki moko nsima mpenza na mosusu. Pe mopepe ezalaki kopepa, mokoto na Ye ezalaki koningana, matiti ezalaki koningana.

⁴¹ Namilobelaki: “Ee, zela moke.” Namiswaki. Nalobaki: “Ee, nalali te.” Pe nabendaki, nakataki eteni ya lititi, boyebi, eloko

moko na kati na yango ezalaka lokola mbanzi ya mino. Natiaki yango na monoko. Nabwakaki miso na nsima, na ndako. Nalobaki: “Te, nazalaki kuna na kati kobondela mpo na papa, Eloko Moko elobaki na ngai ete naya awa, pe namoni Mobali oyo atele mi wana.”

⁴² Namilobelaki: “Ezali lokola Nkolo Yesu.” Namilobelaki: “Nazali komituna soki ezali Ye?” Azalaki kotala mpenza, semba esika ndako na biso ezunami sikawa. Bongo nabalukaki boye mpo natala soki nakokaki komona Ye. Nakokaki komona ngambo ya elongi na Ye boye. Kasi A. . . Nasengelaki kobaluka *boye* mpo namona Ye. Nalobaki: “Uhm!” Aninganaki ata moke te. Namilobelaki: “Nabanzi ete nakobenga Ye.” Nalobaki: “Yesu.” Pe na ntango yango, Abalolaki miso *boye*. Bobele yango nde nazali komikanisela, Asembolaki bobele maboko na Ye.

⁴³ Moyemi ata moko te na mokili akoki koyema elili na Ye, bilembo ya elongi na Ye. Oyo eleki malamumu kati na oyo namona ezali nde *Motó ya Klisto na mibu ntuku misato na misato* ya Hofmann, natiaka yango na mikanda na ngai nyonso pe na biloko nyonso oyo nasalelaka. Ezali mpo ete ekokani mpenza na yango, pe na bongo. . . to ezali mpenza pene, pene mingi mpenza na ndenge ekoki.

⁴⁴ Azalaki lokola (Mobali) oyo soki Alobaki mokili elingaki kosuka, nzoka nde Atondi na bolingo pe na bolamu na lolenge ete bo—bo. . . Nalembaki nzoto. Pe ntango ntongo etani, namimonaki na ntongontongo ete simisi ya pijama na ngai epolaki mobimba na mai ya miso, ntango bomoto na ngai ezongaki, wana nazalaki kotambola, kozonga na ndako kati na matiti.

⁴⁵ Nayebisaki yango moninga na ngai moko moteyi. Alobaki: “Billy, Ekobelisa yo liboma.” Alobaki: “Ezali ya Zabolo.” Pe alobaki: “Komeka komikotisa na makambo ya bongo te.” Na eleko wana nazalaki moteyi ya Batiste.

⁴⁶ Ee, nakendeki epai ya moninga na ngai mosusu ya kala. Nafandaki pe nayebisaki ye Yango. Nalobaki: “Ndeko, okanisi nini mpo na Yango?”

⁴⁷ Alobaki: “Ee, Billy, yoka.” Alobaki: “Nandimi ete soki okoki komeka kokoba kobika sembo, koteya bobele oyo ezali kati na Biblia oyo, ngolu na Nzambe pe bongo na bongo, soki ngai, nalingaki kolanda makambo ya mpamba mpamba te, makambo lokola oyo wana.”

⁴⁸ Nalobaki: “Misie, nalobi te ete nakolanda makambo ya mpamba mpamba.” Nalobaki: “Eloko bobele moko oyo nazali koluka koyeba ezali ete nayeba soki oyo ezali nini.”

⁴⁹ Alobaki: “Billy, na mibu eleki, makambo wana ezalaki na mangomba. Kasi,” alobaki, “ntango bantoma basilaki, makambo yango esilaki elongo na bango.” Pe alobaki: “Sikawa eloko

bobebe moko tozali na yango oyo...baoyo nyonso bamonaka makambo wana,” alobaki, “ezali nde bato na soloka, milimo mabe.”

Nalobaki: “E Ndeko McKinney, ya solo?”

Alobaki: “Iyo, misie.”

Nalobaki: “E Nzambe, yokela ngai mawa!”

⁵⁰ Nalobaki: “Na—na...Oo, Ndeko Mckinney, okosepela—okosepela kobondela na ngai elongo mpo Nzambe atika ata mbala moko te ete ekómela ngai? Oyebe ete nalingi Ye pe naboyi kozala na libunga na makambo oyo.” Nalobaki: “Obondela na ngai elongo.”

⁵¹ Alobaki: “Nakobondela, Ndeko Billy.” Na bongo tobondelaki bobebe wana na—na ndako ya mokengeli mokonzi.

⁵² Natunaki bateyi ebele. Eyano ezalaki bobebe ndenge moko. Bongo nakómaki kobanga kotuna bango, noki te bakanisa ete nazalaki molimo mabe. Na bongo ngai—ngai nde nalingaki kozala bongo te. Nayebaki na motema na ngai ete likambo moko esalemaki. Bongo, esili, eloko—eloko moko esalemaki na motema na ngai. Pe ngai nde nalingaki kozala bongo te, ata mbala moko te.

⁵³ Na bongo nsima na mibu, nayokaki mokolo moko na Première Eglise Batiste epai nazalaki kosambela na eleko wana, nayokaki moto moko koloba: “Tala, osengelaki kokende kuna pe koyoka batuntuki wana lobi na mpokwa.”

⁵⁴ Pe nakanisaki: “Batuntuki?” Ezalaki moninga na ngai, Walt Johnson, azalaki koyemba bass, pe nalobaki: “Olobi nini, Ndeko Walt?”

Alobaki: “Etonga ya ba-Pentekotiste.”

Nalobaki: “Nini?”

⁵⁵ Alobaki: “ba-Pentekotiste!” Alobaki: “Billy, soki ómónaka yango,” alobaki, “bazalaki kobaluka na mabele boye pe kopumbwapumbwa.” Pe alobaki: “Bazalaki koloba ete basengelaki kolobaloba nkota oyo eyebani te, soki bongo te ba—babikisami te.”

Pe nalobaki: “Esika nini?”

⁵⁶ “Oo,” alobaki, “na mwa liyangani moko na nse na hema kuna, na ngambo mosusu ya Louisville.” Alobaki: “Na ntembe te bazali bato moindo.”

Nalobaki: “Boye.”

Alobaki: “Mindele bazali ebele kuna.”

Nalobaki: “Bango pe bazalaki kosala bongo?”

Alobaki: “Iyo, iyo! Bango pe bazalaki kosala bongo.”

⁵⁷ Nalobaki: “Ezali kokamwisa, bato bazali pe kobulungana na makambo ya boye.” Nalobaki: “Ee, nabanzi ete makambo

ya boye pe esengeli kozala.” Ezalaki mokolo ya lomingo moko na ntongo, nakobosana yango ata moke te. Azalaki kolia eteni ya mposo ya lilala ekauka mpo ete libumu na ye enikaki bilei malamuru te, pe nazalaki komona yango lokola ete ezalaki bobele lobi awa. Pe namilobelaki: “Kolobaloba, kopumbwapumbwa, balosambo ya ndenge nini ekobima nsima na oyo?” Na bongo na—nalekaki.

⁵⁸ Nsima na yango, nakutanaki na mobange mobali moko oyo akoki kozala awa na ndakonzambe sikawa, to azalaki awa na ndakonzambe, nkombo na ye John Ryan. Pe nakutanaki na ye na esika moko. . . Mobange yango azalaki na mandefu pe suki milai, pe akoki kozala awa. Nazalaki kokanisa ete autaki awa na Benton Harbor, na Ndako na Dawidi.

⁵⁹ Pe bazalaki na esika moko na Louisville. Nazalaki koluka bato yango, bazalaki kobenga yango Eteyelo ya Basakoli. Na bongo nakanisaki ete nasengelaki kokende kuna mpo namona soki ezali nini. Ee, namonaki ata moto moko kobaluka na mabele te, kasi bazalaki na mateyo ya ndenge mosusu. Kuna nde epai nakutanaki na mobange mobali oyo, abengisaki ngai ete nakende epai na ye.

⁶⁰ Nakendeki lóí kuna. Mokolo moko nazalaki kuna, pe nakendeki lisusu na ndako na ye kasi asilaki kobima, akendeki esika moko na Indianapolis. Mwasi na ye alobaki: “Nkolo abengi ye.”

Nalobaki: “Olingi koloba ete otikaka mobali wana abimaka ndenge wana?”

⁶¹ Alobaki: “Oh, azali moombo na Nzambe!” Nayoki ete mobange mwasi yango auti kokufa eleki mwa bapóso. Pe azalaki komipesa na ye. Ólalá, oyo wana nde lolenge ya mwasi ya kobala! Ya solo. Mobali azala na elonga to te, azali kaka na elonga! Nalobaki. . . Ee, nayebaki ete ba. . .

⁶² Nzoka nde a. . . Ndeko Ryan, ozali awa? Azali awa te. Azalaki awa lobi oyo kuna, boye te, bandeko?

⁶³ Bongo, bazalaki kobika bobele na oyo bakokaki kozua, pe azalaki na eloko ya kolia te na ndako. Ya solo. Nautaki kolóbo mbisi na liziba moko, to na libeke moko, na Michigan, pe nazongaki kuna—nazongaki kuna epai na bango. Na ndako bazalaki ata na mafuta ya ngulu te, ata mafuta te, mpo na kolamba na yango mbisi. Pe nalobaki: “Atiki yo na eloko moko na ndako te?”

Alobaki: “Oo, kasi azali moombo na Nzambe, Ndeko Bill!” Alobaki: “A. . .”

⁶⁴ Pe namilobelaki: “Boye, opambolama. Ndeko, nakosepela mpenza kosunga yo.” Ya solo. “Soki okaniselaka mobali na yo bolamu mingi boye, nabelemi mpo na kozala na yo elongo pe mpo na kosunga yo mpo na yango.” Ya solo. Tosengeli na basi mingi ya

motindo wana lelo, pe na mibali mingi oyo bakaniselaka basi na bango bongo. Ya solo. Amerika elingaki kozala malamuru koleka soki basi na mibali basanganaki bongo. Bazala na elonga to te, bofanda na bango. Koboma mabala elingaki kozala mingi boye te.

⁶⁵ Boye to—tokendeki. . . Bongo nalekaki. Pe ntango nazalaki kozonga na ndako na ngai, ezalaki likambo ya kokamwa, nalekaki na Mishawaka. Namonaki mi—mituka, etelemaki na balabala, nkombo na yango. . . bakomaki nkoma minene likolo na yango ete: “Bobele Yesu.” Nakanisaki: “Nini yango. . . ‘Bobele Yesu’, esengeli kozala ya basambeli.” Napusanaki wana pe namonaki baveló oyo likolo na yango bakomaki, “Bobele Yesu.” Ba-Cadillac, ba-Ford Model-T, nyonso, bakomaki “Bobele Yesu” likolo na yango. Namilobelaki: “Ee, nazali komituna soki ezali nini?”

⁶⁶ Na bongo nalandaki yango; sukasuka namonaki ete ezalaki liyangani ya basambeli, bato nkoto na nkama mitano to nkoto mibale bazalaki wana. Nayokaki bato kogangaganga, kopumbwapumbwa, pe komemama. Namilobelaki: “Tala, awa nde epai nakoyeba ntina ya batuntuki.”

⁶⁷ Na bongo nazalaki na motuka na ngai ya kala, Ford, boyebi, oyo nazalaki kokumisa ete ekokaki kotambola na mbangu ya milles ntuku misato [km 50—N.D.T.] na ngonga moko, zomi na mitano na ngambo *oyo* pe zomi na mitano komata pe kokita na ngambo oyo *kuna*. Bongo natelemisaki yango na ngambo moko, na. . . ntango nazuaki esika ya kotia motuka, pe nazongaki na makolo. Nakotaki, natambwisaki miso, pe baoyo nyonso bakokaki kotelema batelemaki. Nasengelaki kotala na likolo ya mitó na bango. Bazalaki koganga, kopumbwa, kokweya, pe komemama. Nakanisaki: “Uu, uhm, oyo bato ya ndenge nini!”

⁶⁸ Kasi ndenge naumelaki wana, nakómaki komiyoka malamuru koleka. Namilobelaki: “Emonani lokola ezali malamuru mingi.” Namilobelaki: “Eloko moko ya mabe ezali te kati na bango. Bazali mabómá te.” Nabandaki kosolola na bamosusu kati na bango, na bongo ba—bazalaki bato malamuru. Bongo nalobaki. . .

⁶⁹ Ee, boye, bobele na liyangani wana nde nabimaki kuna butu wana mobimba, pe mokolo elandaki nazongaki. Bosilá koyoka ngai koloba yango na lisolo ya bomoi na ngai. Nazalaki na etumbelo elongo na bateyi mokama na ntuku mitano, to nkama mibale, mbala mosusu ata koleka, pe balingaki ete moko na moko atelema pe aloba esika autaki. Pe ngai nalobaki: “Mopalanganisi Nsango Malamuru William Branham, Jeffersonville”, nafandaki, “Batiste,” bongo, nafandaki. Moko na moko alobaki esika autaki.

⁷⁰ Boye mokolo elandaki na ntongo, ntango nakómaki wana. . . Nautaki kolala na esobe butu wana mobimba, pe nafinaki patalo na ngai na katikati ya bakiti mibale ya Ford, boyebi, pe na—

na . . .patalo moko ya kilo ya kala ya karekare, na mwa poló, boyebi. Na bongo mokolo elandaki na ntongo nakendeki na liyangani, nalataki mwa poló na ngai. Nautaki . . .

⁷¹ Nazalaki bobele na dolar misato, pe nasengelaki kosomba essence oyo ekoki mpo ekómisa ngai na ndako. Na—nasombaki mwa mapa, oyo elálá, boyebi, kasi nazalaki malamumu. Pe nakendeki na pompi ya koboma móto, namelaki kopo moko ya mai, boyebi, pe ezalaki malamumu mpenza. Na bongo nalembisaki yango moke na mai, pe naliaki yango na ntongo wana.

⁷² Boye, nakokaki kolia elongo na bango, bongo, bazalaki kolia mbala mibale na mokolo. Kasi nazalaki na makoki ya kopesa makabo te, na bongo naboyaki—naboyaki kolia na nsima na bango.

⁷³ Na bongo na—na bongo nakómaki kuna na ntongo wana, balobaki. . .Nasengeli mpenza koloba eteni oyo. Na bongo nakómaki kuna na ntongo wana, pe balobaki: “Tozali koluka William Branham, elenge mopalanganisi Nsango Malamumu oyo azalaki na etumbelo lobi na mpokwa, azali Batiste.” Alobaki: “Tolingi ete ateya na ntongo oyo.” Namonaki ete elingaki kozala mpasi mpo na ngai, na etonga ya bato wana, mpo ngai nazalaki Batiste. Na bongo namizindisaki mwa moke na kiti na ngai. Nalataki patalo ya kilo ya karekare na poló; boyebi, pe biso tozalaki kolata bilamba ya banganzambe, na bongo . . .Na kiti, namizongisaki nsima boye. Bongo atunaki mbala mibale to misato. Pe nafandaki mpembeni na ndeko moko ya moindo.

⁷⁴ Ntina oyo esalaki ete basala likita na bango epai na Likolo, ezali nde mpo ete na ntango wana bokabwani ya mposo ezalaki kokoba epai na Ngele. Na bongo bakokaki kosala yango epai na Ngele te.

⁷⁵ Bongo nazalaki komituna soki “Bobele Yesu” wana ezalaki nini. Pe namilobelaki: “Lokola ezali nde na ntina na Yesu, mabe ezali te. Na bongo bokeseni ezali te ezala . . .ndenge ezali, lokola ezali nde na ntina na Ye.”

⁷⁶ Boye nafandaki wana mwa moke, nazalaki kotala bango, pe na bongo babengaki lisusu mbala mibale to misato. Pe ndeko oyo ya moindo abalolaki miso epai na ngai pe alobaki: “Oyebi ye?” Na—na—na . . .Ezalaki nde etumba. Nakokaki kokosa mobali yango te, nalingaki te.

Nalobaki: “Tala, ndeko. Iyo, nayebi ye.”

Alobaki: “Boye, kende kokamata ye.”

⁷⁷ Nalobaki: “Ee, yo—yoka, ndeko,” nalobaki, “ezali nde ngai. Kasi, omoni,” nalobaki, “tala, na . . .patalo oyo ya kilo ya karekare.”

“Mata kuna.”

⁷⁸ Pe nalobaki: “Te, nakoki komata kuna te,” nalobaki, “na patalo oyo, boye, na mwa poló oyo.”

Alobaki: “Bato oyo batalaka elateli ya bato te.”

⁷⁹ Pe nalobaki: “Ee, tala, komeka koloba yango te. Oyoki?”
Nalobaki: “Omoni, nalati patalo oyo ya kilo ya karekare, nalingi komata kuna te.”

Balobaki: “Moto moko ayebi epai William Branham azuami?”

Alobaki: “Ye oyo! Ye oyo!”

⁸⁰ Ólálá! Elongi na ngai ekómaki motane ngwa, boyebi; pe nalataki ata kalavati te, boyebi; pe mwa poló oyo ya kala, boyebi, na maboko na yango mikuse boye. Nakendeke pe namataki kuna, matoyi na ngai ezalaki kosala mpasi. Naino natelema pene na mikró ata mbala moko liboso te.

⁸¹ Na bongo nabandaki koteya kuna, pe nakamataki motó na liteya moko, nakobosana yango soko moke te: “Na lifelo, mozui atombolaki miso, pe na nsima alelaki.” Mbala mingi, nateyaka likolo na maloba mike misato ya motindo wana: “Boya kotala moto”, “Yo ondimi yango?” to “Na nsima alelaki.” Pe nazalaki kozongela koloba: “Kuna felele ezali te, pe na nsima alelaki. Kuna mayangani ya mabondeli ezali te, na nsima alelaki. Kuna bana bazali te, na nsima alelaki. Nzembo te, pe na nsima alelaki.” Na nsima nalelaki.

⁸² Bongo ntango esilaki, ee, ólálá, ba . . . bango nyonso bazalaki zongazonga na ngai, balingaki ete nakende koteya epai na bango. Pe namilobelaki: “Aa, ntango mosusu nazali motuntuki!” Bomoni? Na bongo nakanisaki: “Ntango mosusu . . .” Bomoni, bazalaki mpenza bato malamau.

⁸³ Nazalaki kotambola libanda. Mobali moko alataki sapato milai ya babateli na ngombe, na ekoti monene ya babateli na ngombe, nalobaki na ye: “Yo ozali nani?”

Alobaki: “Nazali Mpaka *Sóngóló* ya Texas.”

Namilobelaki: “Boye, ezalaki lokola . . .”

⁸⁴ Mobali mosusu ayaki wana alataki mwa patalo ya golf, boyebi, oyo bazaláká kobeta na yango golf, na mwa triko moko ya jersey. Alobaki: “Nazali Rev. *Pakala* ya Florida. Okosepela koya ko . . .”

⁸⁵ Namilobelaki: “Nazali mpenza komiyoka malamau, bandeko, patalo oyo ya kilo ya karekare na poló oyo. Ezali mpenza malamau.”

⁸⁶ Na bongo, bosílá koyoka makambo wana na lisolo ya bomoi na ngai, boye nakosukisa yango awa mpo nayebisa bino likambo moko oyo naino nayebisa bino yango ata mbala moko te. Likambo ya liboso, nalingi kotuna bino . . . Nalingaki kotika yango mpembeni. Naino nalobá yango ata mbala moko te, na bomoi na ngai, liboso na bato ebele. Soki okolakela ngai ete olingi ngai pe okomeka kolinga ngai ndenge moko olingaki ngai

liboso ete nálobela yango, tombola loboko. Malamu. Yango nde elako na yo, nakokanga yo na maloba na yo moko.

⁸⁷ Na ntango nafandaki na liyangani na mpokwa wana, ntango bazalaki koyemba bazalaki kobeta maboko. Pe bayembaki: “Na. . .” Mwa loyembo wana: “Nayebi ete ezalaki nde Makila. Nayebi ete ezalaki nde Makila.” Bazalaki kokima mbangu kati na milongo, pe bongo na bongo, bazalaki koganga pe kokumisa Nkolo. Namilobelaki: “Ezali kosepelisa ngai mingi mpenza.” Nabandaki. . .

⁸⁸ Pe bazalaki ntango nyonso kolobela Misala, Misala 2:4, Misala 2:38, Misala 10:49, nyonso wana. Namilobelaki: “Aa, ezali nde Makomi! Liboso nazalaki komona Yango bongo te.” Kasi, oo, motema na ngai ezalaki kopela, namilobelaki: “Ezali kitoko!” Nakanisaki ete ezalaki etonga ya batuntuki ntango nakutanaki na bango liboso, pe namilobelaki: “Ólalá! Sikawa bazali lisanga ya banje.” Bomoni, nabongolaki makanisi na ngai mbala moko.

⁸⁹ Na bongo mokolo elandaki na ntongo, ntango Nkolo apesaki ngai libaku ya koteya na mayangani yango, namilobelaki: “Ólalá, nakosangana na etonga ya bato oyo! Esengeli kozala lolenge ya bato oyo bazaláká kobengama ‘Ba-Methodiste oyo bagangaka.’ Bobele ete bango bakei mwa mosika,” nakanisaki bongo. “Ntango mosusu ezali bongo.” Na bongo nakanisaki: “Ee, nazali. . . solo mpenza nasepeli na yango. Oo, bazali na eloko moko oyo nasepeli na yango, bazali na komikitisa pe na boboto.”

⁹⁰ Bongo eloko bobele moko oyo nakokaki kososola te ezalaki nde koloba minoko ya sika wana, oyo wana elekelaki ngai. Pe na. . . Mobali moko azalaki wana, toloba, afandaki *awa* pe mosusu *kuna*, bango nde bazalaki bakambi ya etonga. *Oyo* azalaki kotelema pe koloba minoko ya sika, oyo *wana* azalaki kolimbola yango pe koloba makambo oyo etali liyangani pe bongo na bongo. Namilobelaki: “Ólalá, uu, nasengeli kotanga yango!” Bongo nsima babongoli, ezalaki kokita likolo na *oyo* pe nsima ezongi epai na oyo *kuna*; pe moko na moko azalaki koloba minoko ya sika, pe kolimbola. Bamosusu kati na ndakonzambe pe bazalaki koloba, kasi emonanaki ete ndimbola ekokánákí na oyo ezalaki koya epai na mibali oyo mibale te. Bongo, namonaki ete bafandaki moko mpembeni na mosusu, namilobelaki: “Ólalá, basengeli kozala Banje!” Na bongo na ntango oyo nafandaki kuna na nsima. . .

⁹¹ Ata soki ezalaki nini (boyebi) oyo nazalaki kokoka kososola te, Ezalaki koya likolo na ngai. Nazali na lolenge moko ya koyeba makambo soki Nkolo alingi ete nayeba yango, boyebi. Pe na. . . Yango nde ntina nalobi ete nalobaka yango ata na moto moko te, ata mbala moko te liboso na bato ebele. Soki nalingi mpenza koyeba likambo moko boye, na momeseno Nkolo alobelaka ngai na ntina na makambo yango. Yango nde ntina na likabo, bomoni. Boye okoki bobele kobwaka yango liboso na bato te, ekómi

lokola kobwaka biloko na yo ya motuya liboso na bangulu. Ezali eloko moko mosantu, ya bulee, pe okolinga kosala bongo te. Na bongo, Nzambe akotuna ngai yango. Ndakisa kosolola na bandeko pe bongo na bongo, nakoluka te ete nayeba likambo ya mabe na ntina na ndeko moko boye.

⁹² Mokolo moko nazalaki kolia elongo na mobali moko, atiaki loboko na ye na mapeka na ngai, alobaki: “Oo Ndeko Branham, nalingi yo.” Pe nazalaki koyoka eloko moko koningana. Natalaki ye. Akokaki koloba na ngai bongo te; nayebaki ete azalaki kolinga ngai te, bomoni, mpamba te ezalaki polele. Azalaki mpenza mokóbisi, soki mokóbisi moko akokaki kozala, bomoni, azalaki mpenza wana pe loboko na ye na mapeka na ngai.

⁹³ Nalobaki: “Malamu, likambo te,” nalongwaki wana. Nalingaka koyeba yango te. Malamu ata nayeba ye bobele ndenge nayebi ye, lokola ndeko na ngai, pe suka wana. Nzambe átála oyo etikali. Bomoni? Pe nalingaka te ko . . . nayebaka te, nalingaka koyeba makambo wana te.

⁹⁴ Pe mbala mingi mpo na makambo ya boye, esalemaka awa na ndakonzambe te. Ntango nafandi na eteni ya ndako, nafandi na restaurant, pe Molimo Mosantu ayebisi ngai makambo oyo elingi kosalema. Bato mosusu bazali awa oyo bayebi ete ezali solo. Nafandi na ndako na ngai pe nalobi: “Sikawa, bokeba, motuka moko ekokóma awa nsima na mwa ntango. Ekomema bato *sóngóló*, *pakala*. Bokotisa bango, mpamba te Nkolo nde alobi ete bakoya.” “Ntango tokokende na nzela, makambo *boye na boye* ekosalema. Sala keba na matakanelo wana, mpo ete motuka moko ekolinga kotuta yo.” Pe tala kaka soki ekosalema bongo te, bomoni, mbala nyonso, na lolenge mpenza oyo ebongi be! Na bongo kolinga komikotisa mingi na yango te, mpo ete o . . . E—ezali . . . Okoki kosalela yango, ezali likabo na Nzambe, kasi osengeli kosala keba na oyo ozali kosala na yango. Nzambe akotuna yo yango.

⁹⁵ Botala Mose. Mose azalaki moto oyo atindamaki na Nzambe. Bondimi yango? Abongisamaki liboso, abulisamaki liboso, pe atiamaki mosakoli! Pe Nzambe atindaki ye kuna, Alobaki: “Kende koloba na libanga,” nsima na yango kosila kobetama. Alobaki: “Kende koloba na libanga, pe ekobimisa mai na yango.”

⁹⁶ Kasi Mose, na nkanda, akendeki kuna nokinoki pe abetaki libanga yango. Mai ebimaki te, abetaki yango lisusu, alobaki: “Bino batomboki! Tobimisa mai mpo na bino na libanga oyo?”

⁹⁷ Bomoni oyo Nzambe asalaki? Mai ebimaki, kasi Alobaki: “Yaka awa, Mose.” Likambo esukaki wana, bomoni. Bosengeli kosala keba na makambo wana, na bongo bo . . . oyo bosalaka na makabo na Nzambe.

⁹⁸ Ndenge moko na moteyi, moteyi malamau ya mpiko, oyo akokende koteya bobele mpo na kokongola mabonza pe misolo,

Nzambe akotuna ye likambo yango. Ezali ya solo. Bosengeli kosala keba na oyo bosalaka na makabo na Nzambe. Pe, to koluka kopesa lokumu monene to kilo mingi na lingomba moko boye, to koluka komipesa kilo yango ye moko. Malamu kutu nazua mpokwa mibale to misato ya mayangani nsima nakende esika mosusu, nazala na komikitisa, pe natikala moto na kosokema. Pe boyebi oyo nalingi koloba. Iyo, misie, tikala ntango nyonso na esika na yo, epai wapi Nzambe akoki kotia loboko na Ye likolo na yo.

Nzoka nde likambo oyo etali nde Bomoi ya kati, bokanisa.

⁹⁹ Na bongo mokolo yango, namilobelaki: “Ee, nakopusana pene na bango.” Nazalaki na bobangi mingi liboso na bato wana, namilobelaki: “Nakoluka koyeba likambo ya mibali wana.” Pe nazalaki koluka bango na libanda ntango liyangani esilaki. Natambwisaki miso. Namonaki moko na bango, nalobaki: “Mbote, misie?”

¹⁰⁰ Alobaki: “Mbote!” Alobaki: “Yo nde elenge moteyi oyo ateyaki na ntongo ya lelo?”

Nalobaki. . . Nazalaki na mibu ntuku mibale na misato na eleko wana. Nalobaki: “Iyo, misie.”

Pe alobaki: “Nkombo na yo nani kutu?”

Nalobaki: “Branham.” Pe nalobaki: “Bongo oyo ya yo?”

¹⁰¹ Pe ayebisaki ngai nkombo na ye. Namilobelaki: “Ee, sikawa, soki nakoki bobele kokota na boyokani na molimo na ye sikawa.” Nzoka nde nazalaki koyeba eloko ezalaki kosala bongo te. Pe nalobaki: “Ee, tala, misie,” nalobaki, “bozali na Eloko moko awa oyo ngai nazali na yango te.”

Alobaki: “Wana endimaki yo, ozui Molimo Mosantu?”

Nalobaki: “Ee, nazali Batiste.”

¹⁰² Alobaki: “Kasi wana endimaki yo, ozui Molimo Mosantu?”

¹⁰³ Pe nalobaki: “Ee, ndeko, olingi koloba nini?” Nalobaki: “Oyo bino nyonso bozali na yango ngai na—nazali na yango te, oyo wana nayebi yango!” Nalobaki: “Mpo ete bozali na Eloko moko oyo emonani ete ezali na nguya pe. . .”

Alobaki: “Osila koloba minoko ya sika?”

Pe nalobaki: “Te, misie.”

Alobaki: “Nakoyebisa yo mbala moko ete ozali na Molimo Mosantu te.”

¹⁰⁴ Pe nalobaki: “Boye, soki na . . . Soki yango nde esengeli mpo na kozua Molimo Mosantu, na bongo nazali na Yango te.”

¹⁰⁵ Na bongo alobaki: “Boye, soki olobi naino minoko ya sika te, ozali na Yango te.”

¹⁰⁶ Pe nakobaki kosolisa ye na lolenge wana, nalobaki: “Boye, nakoki kozua Yango wapi?”

107 Alobaki: “Kota na eteni wana ya ndako pe banda koluka Molimo Mosantu.”

108 Pe nakobaki kotala ye, boyebi. Azalaki koyeba te oyo nazalaki kosala, kasi a . . . Nayebaki ete akómaki komiyoka mwa ndenge mosusu, mpo ete a . . . miso na ye ebandaki kokóma lokola moto alangwi ntango azalaki kotala ngai. Pe a . . . Kasi azalaki mpenza Moklisto. Na ntembe te, na mobimba, azalaki Moklisto. Ya solo. Ee, namilobelaki: “Nkembo na Nzambe, Yango oyo! Na—na—nasengeli kokende esika moko boye na etumbelo yango.”

109 Nabimaki, natambwisaki miso bipai nyonso, namilobelaki: “Nakomona mobali oyo mosusu.” Ntango namonaki ye pe nabandaki kosolola na ye, nalobaki: “Mbote, misie?”

110 Alobaki: “Tala, ozali moto ya lingomba nini?” Alobaki: “Bayebisi ngai ete ozali Batiste.”

Nalobaki: “Iyo.”

Pe alobaki: “Naino ozui Molimo Mosantu te, boye te?”

Nalobaki: “Ee, nayebi te.”

Alobaki: “Osila koloba minoko ya sika?”

Nalobaki: “Te, misie.”

Alobaki: “Ozali na Yango te.”

111 Nalobaki: “Ee, nayebi ete oyo bino nyonso bozali na yango ngai nazali na yango te. Oyo wana nayebi yango.” Pe nalobaki: “Kasi, ndeko na ngai, nazali mpenza na mposa na Yango.”

Alobaki: “Boye, liziba ya mai yango—yango wana, ebongisami.”

112 Nalobaki: “Nasila kozua libatisi. Kasi,” nalobaki, “na—nazui naino oyo bino nyonso bozali na yango te.” Nalobaki: “Bozali na eloko moko oyo na—nazali mpenza na mposa na yango.”

Pe alobaki: “Ee, ezali malamú.”

113 Nazalaki koluka kozua ye, bomoni. Pe soki na . . . Sukasuka ntango nakotaki na boyokani na molimo na ye, nzoka nde, oyo wana ezalaki mobali oyo mosusu, soki nasila kosolola na mokíbisi moko ya mabe koleka, oyo wana azalaki moko na bango. Azalaki kobika . . . Mwasi na ye azalaki na suki moindo, azalaki kobika na mwasi mosusu ya suki ya mosaka pe asilaki kobota na ye bana mibale. Azalaki komela masanga, kotuka, kokende na bisika ya milangwa, pe kosala nyonso oyo etikali, nzoka nde kuna azalaki koloba minoko ya sika pe kosakola.

114 Na bongo nalobaki: “Nkolo, limbisa ngai.” Nazongaki na ndako. Ya solo. Nalobaki: “Nako . . . Nazali kososola yango te. Ezalaki lokola ete Molimo Mosantu oyo epambolami nde ezalaki kokita, likolo na mokíbisi wana pe.” Nalobaki: “Ekoki kosalema te! Esili.”

¹¹⁵ Na ntango molai oyo elandaki, nazalaki koyekola pe kolela, kokanisa soki nakokaki kokende elongo na bango ntango mosusu nakokaki kososola likambo yango. Moko oyo, Moklisto ya solo; pe mosusu wana, mokibisi mpenza. Na bongo namilobelaki: “Ezali mpenza nini? Oo,” nalobaki, “E Nzambe, mbala—mbala mosusu mbeba ezali epai na ngai.” Pe lokola nalingaka mibeko, nalobaki: “Yango eko. . . esengeli ete namona yango kati na Biblia. Esengeli.”

¹¹⁶ Mpo na ngai, nyonso oyo ezali kosalema esengeli kouta na Biblia oyo, soki bongo te elongobani pe te. Esengeli kouta Awa. Ekoka kotalisama kati na Biblia, kaka na esika moko mpamba te, kasi esengeli kozuama na Biblia mobimba. Nasengeli kondima yango. Esengeli kosangana pe kosimbana na Makomi nyonso, soki bongo te nakondima yango pe te. Lisusu, mpamba te Polo alobaki: “Soko mwanje na Likolo ayei kosakwela nsango ekeseni, tika ete alakelama mabe.” Na yango ngai nandimi Biblia.

Pe nalobaki: “Nakokaki komona ata eloko moko ya lolenge wana te kati na Biblia.”

¹¹⁷ Nsima na mibu mibale, nsima na ngai kokufela mwasi pe bango nyonso, nazalaki kuna na Green’s Mill, na mwa esika na ngai kuna, nazalaki kobondela. Nazalaki kuna na kati ya lilusú na ngai mikolo mibale to misato, ezalaki nde mikolo mibale. Nabimaki libanda mpo nazua mwa mopepe, nazua mopepe pe ntango nabimaki, Biblia na ngai ezalaki wana na suka ya mobímbí ya nzete moko, bobele na bokoti. Mopepe ekweisaki mobange ya nzete moko, ezalaki na bitape ebele. Sikawa, bino. . . Etape na yango moko etelemaki *boye*, pe nzete yango elalaki. Nafandelaki mobimbi yango makolo ngambo na ngambo, pe nazalaki kolala wana na butu, nazalaki kotala likolo *boye*, loboko na ngai ezalaki likolo *boye*, pe mbala mosusu mpongi ezalaki kozua ngai ntango nalali wana *boye* likolo ya mobímbí yango, wana ezali ngai kobondela. Nazalaki kouwela kuna mikolo ebele, kolia te komela pe te, nazalaki kuna, bobele na mabondeli. Pe nabimaki mpo nazua mwa mopepe ya kitoko, libanda na lilusú yango; na kati kuna ezalaki mpio pe mai mai.

¹¹⁸ Na bongo nabimaki pe Biblia na ngai ezalaki wana na esika natikaki Yango mokolo oyo elekaki pe efungwamaki na Baebete, mokapo ya 6. Pe nabandaki kotanga na esika wana: “Tolongola. . . kino. . . toleka kino suka, totika naino kotia moboko na kobongwana na motema pe misala na kufa pe kondima Nzambe,” pe bongo na bongo. “Zambi ekoki kosalema te mpo na bango basili kongengelama moi, kosangana na likabo na likolo, pe na kolangama,” pe bongo na bongo. Kasi elobamaki: “Nde soko nzube pe matiti mpamba makoki na eloko te, suka na yango. . . mai. . . mbula ekonokaka na mabele mpo na kobongola yango pe kobongisa yango mpo na oyo—oyo ekoki

na eloko te, na nzube pe matiti mpamba, suka na yango kozika na moto.”

Pe Eloko Moko esalaki: “Wuuuussssh!”

¹¹⁹ Namilobelaki: “Yango oyo. Nakoyoka sikawa nyonso oyo A . . . Alamusí ngai awa, Alingi sikawa kopesa ngai emononeli.” Nazalaki kozela wana na suka ya mobimbi yango, pe nazalaki kozela. Natelemaki pe natambolaki mwa moke, nakendeki ngambo na ngambo. Nazongaki, eloko moko esalemaki te. Nazongaki lisusu na lilusú na ngai, eloko moko esalemaki te. Natelemaki wana, nazalaki komilobela: “Ee, likambo nini oyo?”

¹²⁰ Nazongaki lisusu esika Biblia na ngai ezalaki, pe, oo, Eyelaki ngai lisusu. Nakamataki Yango, pe namilobelaki: “Likambo nini ezuami na kati oyo Alingi ete natanga?” Nakobaki kotanga likambo na “kobongola mitema epai na Nzambe, pe na kondimela,” pe bongo na bongo, nakobaki kotanga kino na esika oyo Elobami: “Mbula ekonokaka na mabele mpo na kobongola yango pe mpo na kobongisa yango mpo na ntina na yango, mpo na awa, kasi nzúbe pe matiti mpamba oyo makoki na eloko te, suka na yango kozika na moto.” Pe, oo, Elengisaki ngai!

¹²¹ Pe nakanisaki: “Nkolo, Olingi kopesa ngai emononeli ya oyo . . .” Nakendeki kuna mpo natuna Ye likambo moko.

¹²² Bongo na mbala moko, liboso na ngai, namonaki mabele kobaluka, pe ebongolamaki mobimba mpo na kolona. Mobali moko alataki bilamba ya mpembe alekaki, atombolaki motó, azalaki kolona Milona boye. Pe ntango alekaki, mosusu akómaki, bobele ntango oyo wana alekaki nsima na ngomba, mobali mosusu akómaki nsima na ye, alataki bilamba ya moindo, akitisaki motó, azalaki kolona milona. Ntango Milona malamumu ebimaki, ezalaki blé; pe ntango milona mabe ebimaki, ezalaki matiti mabe.

¹²³ Nsima na yango kokauka monene eyaki na mabele, pe blé egumbaki motó na yango, ekómaki mpenza pene na liwa, esengelaki na mai. Namonaki bato nyonso kotombola maboko, bazalaki kobondela ete Nzambe atinda mai. Nsima na yango namonaki matiti mabe, kokitisa motó na yango, egumbamaki mpo na mposa ya mai. Bobele na ntango yango mapata minene elekaki pe mbula monene ebetaki. Pe na ntango yango, mwa blé oyo egumbamaki mpenza esalaki: “Wish,” emisembolaki. Pe mwa lititi mabe oyo ezalaki mpembeni na yango esalaki: “Wish,” emisembolaki.

Namilobelaki: “Boye, oyo likambo nini?”

¹²⁴ Na bongo Eyelaki ngai na makanisi. Yango wana. Mbula yango moko oyo ezali kokolisa blé, ezali pe kokolisa lititi mabe. Pe Molimo Mosantu yango moko ekoki kokita likolo na etonga na bato, pe Epamboli mokíbisi ndenge moko Epamboli oyo mosusu. Yesu alobaki: “Bokoyeba bango nde na mbuma na bango.” Ezali

te soki agangi, soki aseveli, kasi “ezali na mbuma na ye nde bokoyeba ye.”

¹²⁵ Nalobaki: “Yango mpenza!” “Nasosoli, Nkolo.” Nalobaki: “Boye ezali mpenza Solo.” Mobali oyo... Okoki kozala na makabo pe ozanga koyeba Nzambe.

¹²⁶ Na bongo na—bongo nakómaki na ntembe mingi mpo na minoko ya sika, bomoni. Kasi, na bongo, mokolo moko Nzambe atitolaki yango mpo na ngai!

¹²⁷ Nazalaki kobatisa kuna na ebale, bandimi na ngai ya ebandeli, na Ebale ya Ohio, pe moto ya zomi na nsambo oyo nazalaki kobatisa, lokola nalingaki kobatisa ye, nalobaki: “Tata, wana ezali ngai kobatisa ye na mai, Yo obatisa ye na Molimo Mosantu.” Nabandaki ko—kozindisa ye na mai.

¹²⁸ Bobele na ntango yango ekumbaki moko ekitaki uta na likolo, pe Pole wana eyaki, ezalaki kongenga. Bato nkama na nkama bazalaki na libongo, ezalaki mpenza na ngonga ya mibale na nsima ya nzanga, na sanza ya motoba. Pe Etelemaki mpenza likolo ya esika oyo nazalaki. Mongongo moko ebimaki uta na yango, pe elobaki: “Lokola Yoane Mobatisi atindamaki yambo ya boyei ya liboso ya Klisto, yo ozwi... ozali na Nsango oyo ekosakolama pe ekobongisa Boyei ya Mibale ya Klisto.” Nalingaki kokufa na nsomo.

¹²⁹ Nazongaki, pe bato nyonso wana, ba—basali na kompani ya bibende pe bango nyonso, basali na kompani ya nkísi, pe bango nyonso bazalaki na libongo. Nautaki kobatisa pene na bato nkama mibale to misato na nsima na nzanga wana. Pe ntango babimisaki ngai, ntango babendaki ngai uta na mai, basungi pe bamosusu bayaki wana, batunaki ngai, balobaki: “Pole wana elingaki koloba nini?”

¹³⁰ Bato moindo ebele ya—ya lingomba Batiste Gilt Edge pe ya lingomba Lone Star bazalaki kuna, pe mingi kati na baoyo bazalaki wana, babandaki koganga ntango bamonaki likambo yango kosalema, bato bakweaki nsenza.

¹³¹ Elenge mwasi moko oyo nazalaki komeka kondimisa ete abima na masuwa, afandaki wana pe alataki elamba oyo basukolaka na yango, azalaki molakisi na eteyelo ya Lomingo na lingomba moko boye, pe nalobaki: “Olingi kobima te, Margie?”

Alobaki: “Billy, soki na makasi nakobima te.”

¹³² Nalobaki: “Ya solo, na makasi te, kasi soki ezalaki ngai, nalingaki kozala na limemia oyo ekoki mpo na Nsango Malamu mpo na kobima na esika nazali kobatisa.”

Alobaki: “Na makasi nakobima te.”

¹³³ Pe efandaki ye wana, azalaki koseka pe kotiola ngai ndenge nazalaki kobatisa, mpo ete azalaki kondimela libatisi te, na bongo ntango Mwanje na Yawe akitaki, akweaki pe motó na ye ebambanaki na masuwa. Lelo oyo elenge mwasi yango azali

na ndako ya bato ya mabómá. Na bongo okoki kosakana na Nzambe kaka boye te. Bomoni? Boye, na nsima . . . Elenge mwasi kitoko, na nsima amipesaki na masanga, babambaki ye molangi, molangi ya—ya masanga, ezokisaki ye elongi mobimba. Oo, nsomo mpo na kotala ye! Pe likambo yango esalemaki.

¹³⁴ Na bongo na bomoi na ngai mobimba nazalaki komona yango, komona yango kosala, komona bimononeli yango, ndenge makambo yango ezalaki kosalema. Na bongo, mwa ntango nsima na yango, Ezalaki kotungisa ngai mingi, pe bato nyonso bazalaki koloba na ngai ete Ezalaki mabe. Nakendeki na esika na ngai nalingaka, kuna epai wapi nazalaki ntango nyonso kobondela na etingea kino ete nazua eyano. Pe na . . . Ezali na ntina te boni nazalaki kobondela mpo ete Likambo yango eyela ngai te, Ezalaki kaka koya. Na bongo nazalaki bobele . . . Nazalaki—nazalaki mobатели ya nyama ya zamba na Etuka ya Indiana. Pe nakómaki wana, mobali moko afandaki wana, ndeko ya mobeti piano na lingomba na ngai. Alobaki: “Billy, okosepela kokende na Madison elongo na ngai lelo na nsima na nzánga?”

Nalobaki: “Nakoki te, esengeli ete nakende na zamba ya banyama.”

¹³⁵ Pe na . . . nakómákí mpenza pene na ndako pe nazalaki kologola mokaba na ngai, mokaba ya mondoki pe nyonso, pe nazalaki kogumba maboko ya elamba na ngai. Tozalaki kofanda na ndako moko ya moke ya biteni mibale, pe nalingaki kosukola mpo na komilengela mpo na kolia. Nasilaki kosukola, nazalaki koya na mopanzi ya ndako, na nse ya nzete monene ya—ya erable, pe na mbala moko Eloko Moko esalaki: “Wuuuussssh!” Pe nakómaki pene na kokwea nsenza mpenza. Natalaki, pe nayebaki ete ezalaki lisusu Yango.

¹³⁶ Nafandaki na bibuteli wana, abimaki nokinoki na motuka na ye pe ayaki mbangu epai na ngai, alobaki: “Billy, ozali kokwea nsenza?”

Nalobaki: “Te, misie.”

Alobaki: “Likambo nini, Billy?”

¹³⁷ Pe nalobaki: “Nayebi te.” Nalobaki: “Okoki kokende, ndeko, nazali malamú. Melesí.”

¹³⁸ Mwasi na ngai abimaki libanda pe amemaki mbeki ya mai, alobaki: “Molingami, likambo nini?”

Nalobaki: “Eloko te, bolingo na ngai.”

¹³⁹ Na bongo alobaki: “Yaka, bilei ebéli,” pe azingaki ngai loboko na ye, amekaki kokotisa ngai.

¹⁴⁰ Nalobaki: “Molingami, na—nalingi koyebisa yo likambo moko.” Nalobaki: “Benga bango pe yebisa bango ete nakozala kuna te na nsima ya nzánga oyo.” Nalobaki: “Meda, wa bolingo,” nalobaki, “nayebi na motema na ngai ete nalingi Yesu Klisto. Nayebi ete nasili kolongwa na kufa pe koingela na Bomoi.

Kasi nalingi te ete Zabolo azala ata na likambo moko na ngai.” Pe nalobaki: “Nakoki kokoba boye te; nazali moto na boloko.” Nalobaki: “Ntango nyonso, oyo likambo oyo ezali kokoba kosalema, makambo ya ndenge wana, oyo bimononeli oyo ezali koya, pe bongo na bongo, ndenge wana. To, oyo nyonso yango ekoki kozala,” nalobaki, “ekómelaka ngai.” Nayebaki te ete ezalaki emononeli. Nabengaki yango emononeli te. Nalobaki: “Ezali lokola kosénzwa,” nalobaki, “nayebi te soki ezali nini. Pe, molingami, na—na—na—nalingi te kosala na yango maseki, ba—balobaka na ngai ete ezali ya Zabolo. Nzoka nde ngai nalingi Nkolo Yesu.”

¹⁴¹ “Oo,” alobaki, “Billy, osengeli koyoka oyo bato balobaka na yo te.”

¹⁴² Nalobaki: “Kasi, molingami, tala bateyi mosusu.” Nalobaki: “Na—nalingi yango te.” Nalobaki: “Nakei na esika na ngai na zamba. Nazali na dollar pene na zomi na mitano, batela Billy.” Billy azalaki mpenza mwana moke na eleko wana, mwana moke mpenza. Nalobaki: “Yo—yo batela. . . Ekoki mpo ete yo na Billy bokoka kobika na yango, na mwa ntango. Benga bango pe yebisa bango ete ekoki kosalema ete na—nazonga lobi, ekoki pe kosalema ete nazonga te mpo na libela. Soki nazongi te na mikolo mitano oyo ezali kolanda, batia moto mosusu na esika na ngai.” Pe nalobaki: “Meda, nakobima na zamba wana soko moke te soki Nzambe alaki ngai te ete Akolongola likambo wana mosika na ngai pe ete Akotika ata mbala moko te ete esalema lisusu.” Kanisa ndenge moto akoki kozanga koyeba!

¹⁴³ Pe nakendeki kuna na butu wana. Nazongaki na mwa ndako yango ya nzete, liboso na mokolo oyo ezalaki kolanda; ntango ekómaki mwa mosika. Nalingaki komata na molako na ngai mokolo oyo ezalaki kolanda, kuna na. . . mosika na ngambo mosusu ya ngomba, to, mwa ngomba nde, pe kokóma kuna na zamba. Nandimi te ete F.B.I. bakokaki komona ngai kuna. Na bongo mwa ndako yango. . . Nabondelaki na nsima na nzanga wana mobimba pe liboso ete molili ekóma makasi. Nazalaki kobondela, nazalaki kotanga na Biblia epai wapi Ekomami: “Molimo na basakoli ezali na nse na bokonzi na mosakoli.” Nazalaki kokoka kososola yango te. Na bongo molili ekómaki makasi na kati ya mwa ndako yango.

¹⁴⁴ Ezalaki esika oyo nazalaki kotia mitambo ntango nazalaki mwana moke, natiaki mitambo ebele kuna, nazalaki kokende kolóbo pe kotikala kuna butu mobimba. Ezalaki mwa ndako moko ebeba oyo ezuamaki kuna, ezalaki wana uta mibu ebele. Mbala mosusu moto moko asilaki kofanda wana liboso ete ekóma bongo.

¹⁴⁵ Pe na bongo na—nazalaki bobele kozela wana. Pe namilobelaki: “Malamu.” Ngonga ya yambo ekokaki, ngonga ya mibale, ngonga ya misato ya ntongo, nazalaki kotambola-

tambola, kokende ngambo na ngambo. Nafandaki na mwa ebonga moko kuna, mwa...ebonga te, mwa sanduku moko boye. Nafandaki wana, pe nakanisaki: “E Nzambe, mpo na nini Ozali kosala ngai boye?” Nalobaki: “Tata, Oyebi ete nalingi Yo. Oyebi ete nalingi Yo! Pe na—na—nalingi te ete molimo mabe moko akonza ngai. Nalingi te ete makambo wana ekómela ngai. E Nzambe, kotika soko moke te ete ekómela ngai lisusu.”

¹⁴⁶ Nalobaki: “Na—nalingi Yo. Naboyi kokende na lifelo. Ntina na ngai ezali nini wana ezali ngai koteya pe komeka, pe kobimisa makasi na ngai nyonso, soki nazali na libunga? Pe nazali komimema bobele ngai moko te na lifelo, nazali pe komema bankoto mosusu ya bato na nzela mabe.” To, bankama mosusu ya bato, na eleko wana. Pe nalobaki...Nazalaki na mosala monene. Pe nalobaki: “Boye, na—nalingi lisusu soko moke te ete ekómela ngai.”

¹⁴⁷ Bongo nafandaki na mwa ebonga yango. Pe nafandaki, oo, lokola boye, *bongo* mpenza. Pe, na mbala moko, namoni Pole moko koningana na kati ya eteni ya ndako. Nakanisaki ete moto moko azalaki koya na torche. Natambwisaki miso, pe nakanisaki: “Boye...” Pe Ekómaki wana, liboso na ngai mpenza. Mabaya ya kala ezalaki na nse. Pe Ezalaki wana, liboso na ngai mpenza. Mwa litúká moko ya kala ezalaki na litúmu, eteni na yango ya likolo elongwa. Pe—pe kaka *awa*, Pole moko e—ezalaki na nse, pe namilobelaki: “Boye, ezali wapi? Boye, ekoki koya te...”

¹⁴⁸ Natambwisaki miso. Pe Ekómaki wana, likolo na ngai, kaka Pole *yang*o moko, ezalaki wana mpenza likolo na ngai, Etelemaki mpenza *boye* na likolo. Ezalaki kozunguluka lokola móto, langi na yango ezalaki lokola emelode, Ezalaki kosala: “Wuush, wuush, wuush!” ndenge wana, kaka likolo na Yango, ndenge wana. Pe natalaki Yango. Nakanisaki: “Oyo nini?” Nzoka nde, Ebangisaki ngai.

¹⁴⁹ Nayokaki moto moko koya, [Ndeko Branham amekoli moto oyo azali kotambola—N.D.E.] azalaki bobele kotambola, kasi, makolo ngulu. Pe namonaki lokolo ya Moto moko kokota. Molili ezalaki na kati ya eteni yango, bisika nyonso, longola bobele esika oyo Ezalaki kongenga. Pe namonaki lokolo ya Moto moko oyo azalaki kokota. Pe ntango Akotaki na eteni yango, Ayaki mpembeni, Azalaki Mobali ya pene na...Akokaki kozala na bozito ya pound nkama mibale [90 kg—N.D.T.]. Azingaki maboko na Ye *boye*. Bongo, nasilaki komona Yango kati na Ekumbaki, nasilaki koyoka Yango kosolola na ngai, pe komona Yango na lolenge ya Pole, kasi ezalaki mbala ya liboso ete namona elilingi na Yango. Epusanaki mpembeni na ngai, mpembeni mpenza.

¹⁵⁰ Ee, na bosembo baninga, na—nakanisaki ete nalingaki kosénzwa. Na...Kanisa kaka! Mitia na esika na ngai, Elingaki kosala ete omiyoka ndenge moko na ngai. Ntango mosusu

okómi mosika kati na nzela koleka ngai, ntango mosusu ozali Moklisto ntango molai koleka, kasi Elingaki kosala ete omiyoka ndenge wana. Mpamba te nsima na Ye kokutana na ngai mbala nkama na nkama, ebukaka ngai nzoto ntango Ayaka mpembeni na ngai. Ntango mosusu kútu Ekómisaka ngai. . . Nakómaka mpenza pene na komiyeba lisusu te, mbala mingi, nalembaka mingi mpenza ntango nalongwaka na etumbelo. Soki naumeli ntango molai koleka, na mobimba, namiyebaka lisusu te. Basila kotambwisa ngai na motuka ngonga molai, nayebaki ata esika nazalaki te. Pe nakoki kolimbola yango te. Tanga awa na Biblia, pe Yango nde ekolimbola Yango, oyo yango ezali. Makomi elobi bongo!

¹⁵¹ Na bongo nafandaki wana pe nazalaki kotala Ye. Loboko na—na ngai ezalaki mwa likolo *boye*. Azalaki kotala ngai na miso, na lolenge ya malamú. Kasi Azalaki na Mongongo monene mpenza, pe Alobaki: “Kobanga te, Natindami uta Liboso na Nzambe na-Nguya-nyonso.” Pe ntango Alobaki, Mongongo wana, ezalaki Mongongo yango moko oyo ezalaki ntango nyonso koloba na ngai, uta ntango nazalaki na mibu mibale. Nayebaki ete ezalaki Ye. Pe nakanisaki: “Sikawa. . .”

¹⁵² Pe boyoka yango. Sikawa boyoka ndenge lisolo yango ezalaki. Nakoloba yango malamú na ndenge ekoki, na ndenge nayebeli, liloba moko na moko, mpo ete ezali mpasi mpo na komikanisela.

¹⁵³ A. . . Nalobaki. . . Nazalaki kotala Ye boye. Alobaki: “Kobanga te,” na kimia nyonso, Alobaki: “Natindami uta Liboso na Nzambe na-Nguya-nyonso, mpo nayebisa yo ete mbotama na yo ya lolenge mosusu. . .” Mpo boyebi ndenge mbotama na ngai esalemaki kuna. Bobele Pole wana etelemeki likolo na ngai na ebandeli ntango nabotamaki. Na bongo Alobaki: “Mbotama na yo ya lolenge mosusu pe bomoi na yo oyo basosolaka mabe ezali mpo na kotalisa ete osengeli kokende na mokili mobimba mpo na kobondela mpo na babeli.” Pe Alobaki: “Pe ata soki bakozala na bokono nini. . .” Pe Atangaki nkombo. Nzambe, oyo Azali Zuzi na ngai, Ayebi. Ete, Atangaki nkombo ya “cancer.” Alobaki: “Eloko moko te. . . Soki okoki kosala ete bato bandima yo, pe soki ozali sembo wana ezali yo kobondela, eloko moko ekotelemela mabondeli na yo te, ata cancer pe te.” Bomoni, “Soki okoki kosala ete bato bandima yo.”

¹⁵⁴ Bongo namonaki ete Azalaki monguna na ngai te, Azalaki Moninga na ngai. Pe nazalaki koyeba te soki—soki nalingaki kokufa to likambo nini ezalaki kosalema wana ezalaki Ye koya mpembeni na ngai ndenge wana. Nalobaki: “Ee, Misie,” nalobaki, “nazali. . .” Eloko nini nayebaki na ntina na kobikisama na nzoto pe makambo ya lolenge wana, na ntina na makabo wana? Nalobaki: “Ee, Misie, nazali. . . na—nazali mobola.” Pe nalobaki: “Nazali kati na bato na ngai. Na—nafandi elongo na bato na ngai oyo bazali pe babola. Natángá te.”

Nalobaki: “Pe ntango mosusu na—na—nakokoka te, ntango mosusu bako—bakososola ngai te.” Nalobaki: “Ntango mosusu Ba—bako—bakoyoka ngai te.”

155 Pe Alobaki: “Ndenge moko Mose apesamelaki makabo mibale, bilembo” nde, “mpo na kotatola mosala na ye, yo pe okopesamela mibale—yo pe opesameli makabo mibale mpo na kotatola mosala na yo.” Alobaki: “Moko na yango ekozala ete okosimba moto oyo ozali kobondela mpo na ye na loboko, na loboko na yo ya mwasi okosimba loboko na ye ya mobali,” pe Alobaki, “bongo tikala bobele kimia, pe ekozala na . . . mbano moko ekomonana polele pe ekosalema likolo na nzoto na yo.” Alobaki: “Na ntango wana bondela. Pe soki elongwe, bokono etiki moto yango. Soki elongwe te, senga bobele lipamboli pe kende na yo.”

“Boye,” nalobaki, “Misie, nazali kobanga ete bayamba ngai te.”

156 Alobaki: “Pe likambo oyo elandi ekozala, soki bakolinga koyoka oyo wana te, na bongo bakoyoka oyo.” Alobaki: “Nsima na yango ekosalema ete okoyeba sekele mpenza ya mitema na bango.” Alobaki: “Oyo bakoyoka yango.”

157 “Boye,” nalobaki, “Misie, yango nde ntina nayeli awa na mpokwa oyo. Bandeko na ngai banganganzambe bayebisi ngai ete makambo wana, oyo ekómelaka ngai, ezali mabe.”

158 Alobaki: “Obótámá na mokili oyo na ntina wana.” (Bomoni, “makabo pe kobianga ikobotolama te.”) Alobaki: “Obótámá na mokili oyo na ntina wana.”

159 Pe nalobaki: “Ee, Misie,” nalobaki, “bandeko na ngai banganganzambe bayebisaki ngai bongo, ete ezali ya—ya molimo mabe.” Pe nalobaki: “Ba . . . Yango nde ntina nayaki kobondela awa.”

160 Pe oyo Alobaki na ngai yango oyo. Alobaki na ngai na ntina na boyei na Nkolo Yesu, na mbala na Ye ya liboso. Pe nalobaki . . .

161 Baninga, likambo ya kokamwa ezalaki nde . . . Ee, nakotelema awa mwa moke, nakozonga nsima. Oyo ezalaki kobangisa ngai koleka, ezalaki ete mbala nyonso oyo nazalaki kokutana na moto-na-soloka, bazalaki koyeba ete likambo moko esila kosalema. Pe ezalaki mpenza . . . elingaki mpenza koboma ngai.

162 Ndakisa, mokolo moko ngai na bandeko na ngai tozalaki koleka na—na foire moko, pe tozalaki bobele bana mike, tozalaki kotambola. Bongo moto-na-soloka moko boye afandaki wana kati na moko na bahema wana, elenge mama, elenge mama moko kitoko, afandaki wana. Pe biso nyonso tozalaki kokende, tolekaki wana. Alobaki: “He, yo, yaka naino awa!” Pe biso

misato tobalukaki. Alobaki: “Yo oyo olati mompila ya nzela-nzela.” Ezalaki nde ngai.

¹⁶³ Pe nalobaki: “Olobi nini, madame?” Ngai nakanisaki ete alingaki kotinda ngai nakende kosombela ye coca, to eloko moko boye. Azalaki e—elenge mama, mbala mosusu oyo autaki kokokisa mibu ntuku mibale, to na ndambo, afandaki wana. Pe napusanaki, nalobaki: “Iyo, madame, nakoki kosalela yo nini?”

¹⁶⁴ Pe alobaki: “Tala, oyebi ete Pole mo—moko elandaka yo? Obótámá na nse na elembo moko boye.”

Nalobaki: “Olingi koloba nini?”

¹⁶⁵ Alobaki: “Ee, obótámá na nse na elembo moko boye. Pole moko elandaka yo. Obótámá mpo na kobiangama na Nzambe.”

Nalobaki: “Longwa wana, yo mwasi oyo!”

¹⁶⁶ Nabandaki kokende, mpo ete mama na ngai azalaki koyebisa ngai ntango nyonso ete makambo wana ezali ya Zabolo. Alongaki na ye. Na bongo na . . . Ebangisaki ngai.

¹⁶⁷ Mokolo moko wana ezalaki ngai mobateli ya nyama na zamba, nalingaki kosala mobembo na otobisi. Pe namataki na otobisi. Emonanaki ete nazalaki ntango nyonso na makoki ya koyeba bozali ya milimo. Natelemaki wana, pe mobali moko boye, asalaka na masuwa, atelemaki nsima na ngai. Nazalaki kosala mobembo wana mpo na kosenzela, pe nazalaki kokende na Zamba ya banyama ya Henryville, nazalaki kati na otobisi. Nakobaki komiyoka ndenge mosusu. Natambwisaki miso, pe mwasi mo—moko ya monene mpenza afandaki wana, alataki bilamba kitoko. Alobaki: “Mbote?”

Nalobaki: “Mbote!”

¹⁶⁸ Nakanisaki ete ezalaki bobele mwasi moko, boyebi, oyo azalaki koloba, na bongo na . . . Alobaki: “Nalingi kosolola na yo mwa moke.”

Nalobaki: “Iyo, madame?” Nabalukaki.

Alobaki: “Oyebi ete obótámá na nse ya elembo moko boye?”

¹⁶⁹ Namilobelaki: “Tala lisusu moko na basi ya ndenge.” Na bongo nakobaki bobele kotala libanda. Pe boye nalobaki ata liloba moko te, nakobaki bobele. . .

¹⁷⁰ Alobaki: “Nakoki kosolola na yo mwa moke?” Nakobaki bobele. . . Alobaki: “Kosala boye te.”

¹⁷¹ Nakobaki bobele kotala liboso. Namilobelaki: “Oyo ezali malamumu te.”

Alobaki: “Nalingi kosolola na yo mwa moke.”

¹⁷² Nakobaki bobele kotala liboso, pe nalingaki lisusu koyoka ye ata moke te. Na mbala moko nakanisaki: “Nabanzi ete nakotala soki akoloba lokola bamosusu.” Nabalukaki, namilobelaki:

“Ólalá! Ekolengisa ngai, nayebi.” Mpamba te, nazalaki koboya kokanisa bongo. Nabalukaki.

173 Alobaki: “Ekozala mbala mosusu malamu ete namilimbola.” Alobaki: “Nazali nganga minzoto.”

Nalobaki: “Nayebaki ete ozalaki moto moko ya lolenge wana.”

174 Alobaki: “Nazali kokende na Chicago mpo na kotala mwana na ngai ya mobali oyo azali moteyi ya Batiste.”

Nalobaki: “Iyo, madame.”

175 Alobaki: “Moto moko asila koyebisa yo te ete obótámá na nse na elembo.”

176 Nalobaki: “Te, madame.” Nakosaki ye, bomoni, pe nalobaki. . . nalingaki bobele komona oyo alingaki koloba. Pe alobaki. . . Nalobaki: “Te, madame.”

Pe alobaki: “Boye. . . Bateyi bayebisa yo yango te?”

Nalobaki: “Nazali na ntina ya bateyi te.”

Pe alobaki: “Nde boye.”

Pe nalobaki. . . a—alobaki na ngai. . . Nalobaki: “Ee. . .”

177 Alobaki: “Soki nayebisi yo ntango mpenza ya mbotama na yo, okondima ngai?”

Nalobaki: “Te, madame.”

Pe alobaki: “Ee, nakoki koyebisa yo ntango ya mbotama na yo.”

Nalobaki: “Nandimi yango te.”

178 Pe alobaki: “Obótámá mokolo mwa 6 na sanza ya minei na mobu 1909, na ngonga ya mitano na ntongo.”

179 Nalobaki: “Ya solo.” Nalobaki: “Oyebi yango ndenge nini?” Nalobaki: “Yebisa pe mosali na masuwa oyo ntango ya mbotama na ye.”

Alobaki: “Nakokoka te.”

Pe nalobaki: “Mpo na nini? Oyebi yango ndenge nini?”

180 Alobaki: “Tala, misie.” Alobaki, ntango abandaki sikawa koloba na ntina na minzoto yango, pe alobaki: “Nsima na motango ya mibu boye. . .” Alobaki: “Ozali komikanisela ntango monzoto na ntongo ebimaki, oyo ekambaki bato na mayele kino epai na Yesu Klisto?”

181 Nakimaki motuna yango mwa moke, boyebi, nalobaki: “Ee, nayebi eloko moko te na ntina na kosambela.”

182 Pe alobaki: “Boye, osila koyoka nsango ya bato na mayele oyo bayaki kotala Yesu.”

Nalobaki: “Iyo.”

Pe alobaki: “Ee, bato na mayele bazalaki banani?”

“Oo,” nalobaki, “bazalaki kaka bato na mayele, yango nde nyonso oyo ngai nayebi.”

¹⁸³ Alobaki: “Ee, moto na mayele azali nani?” Alobaki: “Yango mpenza nde nazali, nganga minzoto, ‘motali minzoto’, ndenge babengaka bango.” Pe alobaki: “Oyebi, ntango nyonso, liboso ete Nzambe asala likambo soko nini na—na mokili, Amonisaka yango naino na likolo, bongo nsima nde na mokili.”

Pe nalobaki: “Nayebi te.”

¹⁸⁴ Pe alobaki: “Ee . . .” Atangaki bankombo ya minzoto mibale to misato, mibale . . . misato, ndakisa Mars, Jupiter pe Venus. Ezalaki yango te, kasi alobaki: “Ekutanaki, esalaki molongo pe esalaki . . .” Alobaki: “Bato na mayele misato bayaki kokutana na Nkolo Yesu, pe moko autaki na libota na Hama, mosusu na oyo ya Semi, pe oyo mosusu na oyo ya Yefete.” Pe alobaki: “Ntango bakutanaki na Beteleme, minzoto misato oyo bango bautaki na yango . . . Moto nyonso na mokili,” alobaki, “azali na likambo na minzoto.” Alobaki: “Tuna moto oyo kuna, asalaka na masuwa, ntango sanza etangwaka pe monzoto ya likolo etangwaka soki mai ekitaka te pe emataka na yango te.”

Nalobaki: “Nasengeli kotuna ye yango te, nayebi yango.”

¹⁸⁵ Pe alobaki: “Ee, mbotama na yo ezali na likambo na minzoto ya likolo.”

Pe nalobaki: “Ee, oyo wana nayebi yango te.”

¹⁸⁶ Alobaki: “Boye, bato na mayele oyo misato bayaki.” Alobaki: “Ntango minzoto yango misato, ntango e . . . Eutaki moko na moko na nzela na yango pe ekutanaki na Beteleme. Pe balobaki, bayebaki na kokutana na bango ete bautaki moko na libota ya Hama, ya Semi, pe ya Yefete, bana mibali misato ya Noa.” Alobaki: “Bongo bayaki pe bakumbamelaki Nkolo Yesu Klisto” pe alobaki: “Ntango balongwaki,” alobaki, “bamemaki makabo pe babonzelaki Ye.”

¹⁸⁷ Alobaki: “Yesu Klisto, kati na mosala na ye, alobaki ete Nsango Malamu oyo ekosila koteyama na mokili mobimba (epai na libota ya Hama, Semi, pe Yefete), nsima na yango nde Akoya lisusu.” Pe alobaki: “Nzoka nde, minzoto minene wana, minzoto minene ya likolo, ntango etambolaka . . .” Alobaki: “Ekabwanaki. Uta ntango wana, esalema lisusu bongo te na mokili, ndenge eyebani. Kasi” alobaki “nsima na mibu nkama na nkama, banzela na yango ekutanaka *boye*.” Soki moyekoli minzoto moko azali awa, okoki koyeba oyo azalaki koloba. Ngai nayebi te. Boye ntango azalaki kolob . . . Alobaki: “Ekutanaka bongo.” Pe alobaki: “Mpo na kokundola Likabo eleki monene oyo epesamela bato, ntango Nzambe apesaki Mwana na Ye. Ntango minzoto minene oyo ekutani lisusu, na bongo,” alobaki, “Atindi likabo mosusu na mokili.” Alobaki: “Obotama na ntango

oyo yango ekutanaki.” Pe alobaki: “Yango nde ntina nayebaki yango.”

¹⁸⁸ Ee, na bongo nalobaki: “Madame, likambo ya liboso nandimi ata eloko moko kati na yango te. Nasambelaka te, pe nalingi lisusu koyoka yango te!” nalongwaki wana. Pe na bongo nakataki ye maloba na mokuse. Na bongo nabimaki pe nakendeki.

¹⁸⁹ Pe mbala nyonso oyo moko. . . oyo nazalaki na moko na bango, ezalaki kosalema bongo. Nazalaki komilobela: “Mpo na nini milimo mabe wana basalaka boye?”

¹⁹⁰ Boye bateyi, bazalaki koloba: “Ezali ya Zabolo! Ezali ya Zabolo!” Bakómaki kino kondimisa ngai yango.

¹⁹¹ Na bongo na butu wana, kuna, ntango na. . . ntango Azongelaki koloba yango, natunaki ye, nalobaki: “Ee, mpo na nini esalemaka ete bato na soloka pe bamosusu, pe bato na milimo mabe, nde balobaka na ngai ntango nyonso na ntina na yango; na ntango oyo banganzambe, bandeko na ngai, balobaka na ngai ete ezali ya molimo mabe?”

¹⁹² Boyoka oyo Ye alobaki, Ye oyo, Oyo azuami na fotó wana. Alobaki: “Ndenge esalemaki kalakala, ezali pe kosalema bongo lelo.” Pe Abandaki kolobela ngai, ete, “Ntango mosala ya Nkolo na biso Yesu Klisto ebandaki komonana, bateyi balobaki ete ‘Azalaki Bezebula, Zabolo’; kasi milimo mabe balobaki ete ‘Azalaki Mwana na Nzambe, Mosantu ya Yisalaele.’ Milimo mabe. . . Pe botala Polo na Balanaba ntango bazalaki koteya kuna. Bateyi balobaki: ‘Bato oyo bazali kotia mobulu na mokili. Bazali mabe, bazali—bazali ya Zabolo.’ Pe moto na soloka moko boye na balabala, asosolaki ete Polo na Balanaba bazalaki bato na Nzambe, alobaki: ‘Bazali bato na Nzambe oyo bazali kosakolela biso nzela na Bomoi.’” Boye te? “Bato na soloka pe banganga nkisi, bato na milimo mabe.”

¹⁹³ Kasi tobebi mpenza na thologie na lolenge ete toyebi lisusu eloko moko te na oyo etali Molimo. Nabanzi ete bokokoba kolinga ngai nsima na oyo. Kasi ezali nde bongo. Nalingi koloba ata pe Bapentokotiste! Ya solo. Bobele koganga pe kobina elingi koloba te ete oyebi soko nini na oyo etali Molimo.

¹⁹⁴ Ezali nde bokutani na moto ye moko, miso na miso, yango nde bosengeli na yango. Yango nde lolenge ya Lingomba oyo Nzambe alingi kotelemisa, ya solo, ntango bayangani na bomoko pe na guya, na Molimo.

¹⁹⁵ Pe Alobelaki ngai yango. Ayebisaki ngai ete bateyi basosolaki yango mabe, pe Andimisaki ngai na ntembe te ete bateyi basosolaki yango mabe. Pe ntango Ayebisaki ngai nyonso na ntina na yango pe ndenge Yesu. . . .

¹⁹⁶ Nalobaki: “Ee, Olobi boni mpo na oyo, makambo oyo ekómelaka ngai?”

¹⁹⁷ Pe, bomoni, Alobaki: “Ekoyikana pe ekokoba koya monene.” Pe Alobaki na ngai na ntina na Yesu, ete Ye pe asalaki ndenge moko; ete Ayaki pe Alatisamaki na Nguya oyo ekokaki koyeba makambo liboso pe koyebisa basi wana na liziba, Alobaki te ete Akokaki kobikisa babeli, Alobaki ete Azalaki kosala makambo wana mpenza ndenge Tata azalaki kotalisa Ye.

Nalobaki: “Boye, ekokaki kozala molimo ya lolenge nini?”

Alobaki: “Ezalaki nde Molimo Mosantu.”

¹⁹⁸ Na bongo likambo moko esalemaki kati na ngai kaka wana, nasosolaki ete eloko mpenza oyo nazalaki kopesa mokongo ezalaki nde oyo na ntina na yango Nzambe atiaki ngai awa. Pe nasosolaki ete ezalaki mpenza lokola Bafalisai ya kalakala, balimbolelaki ngai Makomi mabe. Na bongo banda wana nakamataki ndimbola na ngai moko mpo na yango, oyo Molimo Mosantu alobaki.

Nayebisaki ye: “Nakokende.”

Alobaki: “Nakozala na yo.”

¹⁹⁹ Pe Mwanje akotaki lisusu kati na pole oyo ebandaki kozunguluka-zunguluka, pe kozunguluka na makolo na Ye bongo, Amataki kati na pole pe Abimaki na ndako.

Nazongaki na ndako moto ya sika.

²⁰⁰ Nakendeki na ndako Nzambe na makolo pe nalobaki yango epai na bato. Mo . . . ezalaki mokolo ya lomongo na mpokwa.

²⁰¹ Pe mokolo ya misato na mpokwa bamemaki mwasi moko kuna, moko na mafulume ya lopitalo Mayo oyo azalaki kobunda na liwa ya cancer, atikalaki bobele mikuwa ya mpamba. Ntango nakitaki mpo na kosimba ye, liboso emononeli eyelaki ngai, etalisaki ete azongelaki mosala na ye ya lifulume. Pe nkombo na ye ezali na liste ya Louisville, lokola “moto oyo asila kokufa eleki mibu.” Azali sikawa kuna na Jeffersonville, na mosala ya lifulume, azali kosala mosala na ye ya lifulume uta mibu ebele. Na bongo, natombolaki miso, pe namonaki emononeli yango. Nabalukaki, nazalaki lisusu koyeba mpenza te oyo nazalaki kosala, natelemaki wana, nalengaki liboso ntango bamemaki mobeli wana pe balalisaki ye wana. Mafulume na bamosusu bazalaki zongazonga na ye, ye alalaki wana, elongi na ye ekondaki pe miso na ye ekotaki.

²⁰² Margie Morgan. Soki bolingi kokomela ye mokanda, afandi na 411 Knobloch Avenue, Jeffersonville, Indiana. To bokomela Clark County Hospital, Jeffersonville, Indiana. Akopesa bino li—litatoli yango.

²⁰³ Natalaki wana. Pe komona ete, mpo na mobeli yango ya liboso, emononeli eyaki. Namonaki mwasi yango kozongela mosala na ye ya lifulume, kotambola, na nzoto malamamu, makasi pe kolongono. Nalobaki: “YANGO ELOBI NKOLO, ‘Okozala na bomoi pe okokufa te!’”

204 Mobali na ye, moto monene mpo na oyo etali makambo ya mokili oyo, atalaki ngai *boye*. Nalobaki: “Misie, kobanga eloko moko te! Mwasi na yo akozala na bomoi.”

205 Abengaki ngai libanda, alobaki...abengaki minganga mibale to misato, alobaki: “Oyebi bango?”

Nalobaki: “Iyo.”

206 “Ee,” alobaki, “nabétá lisano ya golf elongo na ye. Alobaki ete ‘cancer ezingaki misopo na ye, bakokaki ata kotongola ye te.”

207 Nalobaki: “Oyo azali na yango etali ngai te! Eloko moko ezali na kati na ngai, namonaki emononeli! Pe Mobali oyo asololaki na ngai, Alobaki ete nyonso oyo nakomona, náloba yango pe ekosalema bongo. Alobaki na ngai pe ngai nandimi yango.”

208 Nkembo na Nzambe! Mwa mikolo nsima na yango akómaki kosukola bilamba na ye, kotambola. Azali sikawa na bozito pene na livres mokama na ntuku motoba na mitano [kilo 75—N.D.T.], na nzoto kolongono mpenza.

209 Na bongo, ntango kaka nandimaki yango, mbala moko nsango ekei. Bongo Robert Daugherty abengaki ngai. Pe nsango epanzanaki, na Texas mobimba pe na mokili mobimba.

210 Pe mokolo moko na mpokwa, ezalaki pene na mbala ya minei to ya mitano oyo...Nazalaki kososola te likambo ya koloba minoko ya sika pe bongo na bongo. Nazalaki kondima libatisi ya Molimo Mosantu, nazalaki kondima ete bato bakoki koloba minoko ya sika. Pe mokolo moko na mpokwa ntango nazalaki kokende na...na kati ya katedrale moko, na San Antonio, na Texas, ntango nazalaki kokende na etumbelo, elenge mobali moko afandaki wana abandaki koloba minoko ya sika lokola mondoki oyo ezali kobeta, to mitrailleuse, noki noki. Na suka, kuna na suka, elenge mobali moko atelemaki pe alobaki: “YANGO ELOBI NKOLO! Mobali oyo azali kokende na etumbelo azali kokende liboso na mosala moko oyo etindami na Nzambe na-Nguya-nyonso. Pe pelamoko Yoane Mobatisi atindamaki lokola motindami ya liboso yambo ya boyei ya Klisto, ye pe azali na Nsango moko oyo ekomema Boyei ya Mibale ya Nkolo Yesu Klisto.”

211 Nalingaki nazinda kati na sapato na ngai. Natombolaki miso, nalobaki: “Oyebi mobali wana?”

Alobaki: “Te, misie.”

Nalobaki: “Oyebi ye?”

Alobaki: “Te, misie.”

Nalobaki: “Oyebi ngai?”

Alobaki: “Te, misie.”

Nalobaki: “Ozali kosala nini awa?”

212 Alobaki: “Natangaki yango na zolonale.” Pe na momeseno... Oyo wana ezalaki mpokwa ya liboso ya mayangani.

Natalaki kuna pe nalobaki: “Okómi awa ndenge nini?”

213 Alobaki: “Bato ya libota na ngai bayebisaki ngai ete olingaki kozala awa, ‘mobikisi uta na Nzambe,’ pe ngai naye.”

Nalobaki: “Bino nyonso boyebani te?”

Alobaki: “Te.”

214 Ólalá! Wana nde esika namonaki ete nguya yango moko ya Molimo Mosantu... Nzoka nde na ntango moko boye liboso na yango nazalaki kokanisa ete ezalaki eloko mabe, pe nayebaki ete na... Mwanje yango moko ya Nzambe azalaki na boyokani na bato oyo bazalaki na makambo yango. Atako bazalaki na oyo ya solosolo te, na mobulu mingi pe na bilobela mingi kati na yango, kasi ata bongo likambo ya solosolo ezalaki na kati na yango. [Maloba ezangi na eteni oyo ya bande—N.D.E.]... Klisto. Namonaki ete e—ezalaki solo.

215 Oo, mibu eleki mwa mingi, pe na mayangani bato bazalaki komona, bimononeli pe bongo na bongo.

216 Mbala moko mokangi fotó moko akangaki Yango fotó ntango nazalaki esika moko boye na Arkansas, nabanzi ezalaki kuna, na liyangani moko penepene lokola oyo, na eyanganelo penepene lokola oyo. Pe nazalaki wana, nazalaki komeka kolimbola Yango. Bato bayebaki, bazalaki kofanda pe koyoka, ba-Methodiste, ba-Batiste, ba-Presbiterien, pe bongo na bongo. Bongo ntango natalaki, namonaki Yango kokota, Ekómaki, Ezalaki kosala: “Wuushh, wuushh!”

217 Nalobaki: “Ezali lisusu na ntina te ete nakoba koloba, mpamba te Yango oyo Ezali koya sikawa.” Ezalaki koya, pe bato babandaki koganga. Eyaki kino na esika oyo nazalaki pe etelemaki wana.

218 Kaka na ntango oyo Ezalaki kotelema, moteyi moko ayaki wana noki noki pe alobaki: “He, namoni Yango!” Pe Ebomaki miso na ye mo—mobimba mpenza, pe azongaki na kotengatenga. Bokoki kotala fotó na ye kuna na buku pe bokomona ndenge azalaki kozonga na kotengatenga wana egumbaki ye motó boye. Bokoki kotala fotó na ye.

219 Pe Etelemaki wana. Bobele mokangi fotó ya zolonale nde akangaki Yango fotó na mbala wana. Kasi Nkolo abelemaki te.

220 Pe na mpokwa moko na Houston, na Texas, na ntango oyo, oo, bato nkoto na nkoto... Bato bazalaki nkama mwambe... nkoto mwambe kuna na nini-oyo, kuna na ndako ya mindule, pe tokendeke na Libanda monene na masano ya Sam Houston.

221 Pe kuna, kati na bowelani ya mpokwa wana, ntango moteyi moko ya Batiste alobaki ete ngai “nazali eloko mosusu te

bobebe suka na mokibisi pe mokosi monene, mokosi monene ya kosambela, ete basengelaki kobengana ngai na engumba” pe ete ye nde moto asengelaki kosala yango.

222 Ndeko Bosworth alobaki: “Ndeko Branham, okotika mpenza likambo ya boye esalema? Sukisa ntembe wana!”

223 Nalobaki: “Te, misie, nakoki kondima te ete bato bawelana. Nsango Malamu epesami te mpo toswanaka likolo na Yango, kasi Epesami nde mpo tobikela Yango.” Pe nalobaki: “Ata soki ondimesi ye ndenge nini, akokoba bobebe kolanda nzela wana.” Nalobaki: “A . . . ekosala ye eloko moko te. Soki Nzambe akoki kolobela motema na ye te, ngai nakokoka kosala yango ndenge nini?”

224 Mokolo elandaki ekomamaki na zolonale, balobaki: “Ezali kotalisa oyo ezali kati na bango,” na Houston Chronicle. Balobaki: “Ezali kotalisa oyo ezali kati na bango, bazali kobanga koyambela oyo bateyaka.”

225 Mobange Ndeko Bosworth ayaki epai na ngai, asilaki kolekisa mibu ntuku nsambo na eleko wana, azali ndeko moko mobange malamumu, atiaki loboko na ye na mapeka na ngai, alobaki: “Ndeko Branham,” alobaki, “olingi koloba ete okosukisa ntembe wana te?”

226 Nalobaki: “Te, Ndeko Bosworth. Te, misie. Nakosukisa yango te.” Nalobaki: “Ezali ata na litomba moko te.” Nalobaki: “Ebendaka bobebe makelele ntango tolongwaka na etumbelo.” Nalobaki: “Nazali na mayangani mikolo oyo, pe naboyi kobebisa makambo bongo.” Nalobaki: “Tika ye asala.” Nalobaki: “Esili, azali bobebe koloba bilobaloba.” Nalobaki: “Tosila komona bato ya boye, kosolola na bango pe ezali ata na litomba moko te.” Nalobaki: “Bakokende mbala moko, bakotikala na makambo na bango.” Nalobaki: “Soko basili kozua boyebi na Solo bongo na nsima bakoboya koyamba Yango, Biblia elobi ete bakatisi ndelo pe bakolimbisama te, soko na ntango oyo soko na ntango ekoya. Babengi Yango “ya Zabolo” pe nzela mosusu ezali te mpo na bango. Bazali na molimo ya kosambela oyo ezali Zabolo.”

227 Boni bayebi ete ezali ya solo, ete molimo mabe esambelaka? Iyo, misie, balingi mibeko mpenza. Boye, na bongo, esepelisi bato te ntango nalobi “balingi mibeko,” kasi ezali ya solo. “Bato bazali na lolenge na kosambela nde bazali koangana Nguya na yango.” Ezali ya solo. Bilembo pe bikamwiseli nde etatolaka Nzambe, ntango nyonso. Alobaki ete ekozala ndenge moko na ntango na suka. Pe tala malamumu!

228 Mobange Ndeko Bosworth, na . . . alingaki koya elongo na ngai, kasi azalaki na mwa bolembu. Auti na Japon. Alingaki kozala awa. Akokende na Lubbock elongo na ngai. Boye azalaki . . . azalaki na mwa, na miyoyo makasi, na bongo mbala oyo akokaki koya te, ye na mwasi na ye. Boye a . . .

229 Moto nyonso amonaki ete azalaki lokola Kalebe. Azalaki wana, alobaki: “Ee, Ndeko Branham,” na etaleli oyo ebongi mpenza, boyebi, alobaki, “tika ngai nakende kosala yango,” pe alobaki, “soki yo oboyi kosala yango.”

230 Nalobaki: “Oo, Ndeko Bosworth, na—nalingi te ete osala yango. Bokoki kowelana.”

Alobaki: “Ata liloba moko mpamba ya kowelana ekobima kuna te.”

231 Sikawa, liboso ete nasilisa, boyoka likambo oyo. Akendeki kuna. Nalobaki: “Soki bokowelana te, malamuu.”

Alobaki: “Nalaki ete nakowelana te.”

232 Penepene na bato nkoto ntuku misato bayanganaki na eyanganelo wana na mpokwa wana. Ndeko Wood, oyo afandi awa, azalaki wana na ntango yango, pe azalaki kati na eyanganelo yango. Pe na . . .

233 Mwana na ngai ya mobali alobaki, to . . . Mwasi na ngai alobaki: “Okokende na liyangani wana te?”

234 Nalobaki: “Te. Nakoki kokende kuna te mpo na koyoka bango kowelana. Te, misie. Nakoki kokende kuna te mpo na koyoka yango..”

Ntango butu eyindaki, Eloko Moko elobaki: “Kende kuna.”

235 Nazuaki taxi, ndeko na ngai ya mobali, mwasi na bana na ngai, tokendeki kuna. Pe namataki likolo mpenza na balkon ya ntuku misato, likolo mpenza boye, pe nafandaki.

236 Mobange Ndeko Bosworth amataki na eteyelo lokola ntoma mpenza ya ekólo moko boye, boyebi. Asilaki kozongela kokoma ba . . . Asilaki kokoma bilaka nkama motoba ndenge na ndenge ya Biblia pe azalaki na yango wana. Alobaki: “Sikawa, Molakisi Best, okoki komata awa pe kokamata moko mpamba kati na bilaka oyo mpo na kotalisa polele na nzela na Biblia ete ezali lokuta. Moko na moko na bilaka oyo ezunami kati na Biblia, ezali koloba na ntina na Yesu Klisto ete azali kobikisa babeli lelo. Soki okoki kokamata moko mpamba kati na bilaka oyo pe, na nzela na Biblia, kosala ete etelemela Biblia, nakofanda, nakopesa yo mbote, nakoloba: ‘olongi.’”

237 Alobaki: “Nakotala likambo wana ntango nakomata na eteyelo!” Alingaki ete azala moto ya suka mpo akoka kosambwisa Ndeko Bosworth, bomoni.

238 Na bongo Ndeko Bosworth alobaki: “Ee, Ndeko Best, nakotuna yo motuna moko mpamba, pe soki oyanoli ngai ‘iyo’ to ‘te,’” alobaki, “tokosukisa bowelani na biso bobele sikawa.”

Pe alobaki—alobaki: “Nakotala likambo yango!”

Atunaki mokambi soki akokaki kotuna ye motuna yango. Alobaki: “Iyo.”

239 Alobaki: “Ndeko Best, bankombo na Yawe na ntina na lisiko etaleli pe Yesu? ‘Iyo’ to ‘te?’”

240 Ekataki likambo. Esukaki. Nayebisa bino, mbala moko nayokaki eloko moko na nzoto mobimba. Natikalaki kokanisa bongo te, ngai moko, bomoni. Pe namilobelaki: “Ólalá, akoki koyanola te! Akangami.”

Alobaki: “Ee, Molakisi Best, na—nakamwe.”

Alobaki: “Nakotala likambo yango!”

241 Alobaki: “Nakamwe ndenge okoki te koyanola na motuna na ngai oyo eleki pete.” Azalaki na kimia mpenza, pe ayebaki esika atelemaki. Nsima na yango afandaki wana na Likomi yango.

Alobaki: “Silisa miniti na yo ntuku misato, nakoyanola nsima na yango!”

242 Mobange Ndeko Bosworth afandaki wana, akamataki Likomi yango pe akangaki mobali wana na yango na lolenge ete elongi na ye ekómaki motane ngwa ete okokaki ata kopelisa na yango aliméti.

243 Atelemaki pe alongwaki wana, na kanda, abwakaki nkasa pe epanzanaki na nse, amataki na eteyelo pe ateyaki liteya moko kitoko ya Bacampbellite. Nazaláká Batiste, nayebi oyo bandimaka. Ata mbala moko te a . . . Azalaki koteya na ntina na lisekwa, “‘wana nzoto oyo na kufa ekolata kozanga-kokufa,’ na ntango yango nde tokozua lobiko na nzoto kouta na Nzambe.” Ólalá! Ntina na lobiko na nzoto kouta na Nzambe ekozala nini wana ekókoma biso bazangi-kokufa (“wana nzoto oyo na kufa ekolata kozanga-kokufa,” lisekwa na bakufi)? Atiaki ata ntembe mpo na likamwisi oyo Yesu asalaki na Lazare, alobaki: “Akufaki lisusu, pe ezalaki bobele likambo ya mwa ntango moke.” Bomoni?

244 Pe ntango asilisaki boye, alobaki: “Boya na mobikisi ya babeli uta na Nzambe wana awa pe námóna ye kosala!”

245 Na ntango yango babendanaki mwa moke. Ndeko Bosworth alobaki: “Ozali kokamwisa ngai, Ndeko Best, ndenge oyanoli te na motuna moko mpamba oyo natuni yo.”

246 Bongo atombokaki makasi na ntango yango, alobaki: “Boya na mobikisi yango ya babeli uta na Nzambe awa pe námóna ye kosala!”

Alobaki: “Ndeko Best, ondimaka ete bato bazali kozua lobiko?”

Alobaki: “Na ntembe te!”

Alobaki: “Okolinga babenga yo mobikisi uta na Nzambe?”

Alobaki: “Ya solo nakolinga te!”

247 “Ndenge moko pe . . . Ezali te mpo oteyaka lobiko ya milimo nde okómi mobikisi uta na Nzambe.”

Alobaki: “Ee, ya solo ezali bongo te!”

248 Alobaki: “Ndenge moko pe Ndeko Branham akómi mobikisi ya babeli uta na Nzambe te mpo ateyaka lobiko na nzoto kouta na Nzambe. Azali mobikisi ya babeli uta na Nzambe te, atalisaka bato epai na Yesu Klisto.”

249 Pe alobaki: “Boya na ye awa, namona ye kosala! Botika ngai nalandela bato yango, nsima na mobu moko, bongo nayebisa bino soki nakondima Yango to te.”

250 Ndeko Bosworth alobaki: “Ndeko Best, wana ekómi lokola tozongi na Kalvari: ‘Kita na Ekulusu bongo tokondimela Yo.’” Bomoni?

251 Na bongo, oo, na ntango yango asilikaki. Alobaki: “Namona ye kosala! Namona ye kosala!” Bakambi bafandisaki ye. Akendeke kuna, epai moteyi moko Pentekotiste atelemaki, pe abetaki ye bambata longwa na ngambo moko ya eteyelo kino na ngambo mosusu. Bongo bakangaki ye. (Na bongo Ndeko Bosworth alobaki: “He, he! Te, te.”) Bongo bakambi bafandisaki ye.

252 Raymond Richey atelemaki, alobaki: “Oyo nde lolenge ya Likita ya ba-Batiste ya Ngele?” Alobaki: “Bino bateyi ya ba-Batiste, Likita ya ba-Batiste ya Ngele nde etindi mobali oyo awa to ayei na ndenge na ye?” Bapesaki eyano te. Alobaki: “Natuni nde bino!” Ayebaki bango, bango nyonso.

253 Balobaki: “Ayei na ndenge na ye.” Mpamba te nayebi ete ba-Batiste bandimaka pe lobiko na nzoto kouta na Nzambe. Na bongo moko alobaki: “Ayei na ndenge na ye.”

254 Na bongo likambo elandaki yango oyo. Nsima Ndeko Bosworth alobaki: “Nayebi ete Ndeko Branham azali kati na liyangani, soki alingi koya kosukisa liyangani, ekozala malamumu mpenza.”

Na bongo Howard alobaki: “Fanda kimia!”

Nalobaki: “Nafandi kimia.”

255 Bobele na ntango yango Eloko Moko eyaki wana, ebandaki kozunguluka, pe nayebaki ete Ezalaki Mwanje na Nkolo, Alobaki: “Telema!”

256 Penepene na bato nkama mitano basimbanaki maboko *boye*, basalaki nzela, nakitaki kino na eteyelo.

257 Nalobaki: “Baninga na ngai, nazali mobikisi ya babeli uta na Nzambe te. Nazali ndeko na bino.” Nalobaki: “Ndeko Best, ezali te mpo . . .” To, “Ndeko Best,” nalobaki, “ezali te mpo na kokitisa lokumu na yo, ndeko na ngai, ata moke te. Ozali na makoki ya kondima oyo ondimaka, ngai pe lokola.” Nalobaki: “Na ntembe te, omoni ete okoki kotalisa likambo na yo polele te, liboso na Ndeko Bosworth. Ndenge moko pe okoki kosala yango te liboso na moto nyonso oyo ayekoli Biblia malamumu, oyo

ayebi makambo yango.” Nalobaki: “Mpo na oyo etali kobikisa bato, nakoki kobikisa bango te, Ndeko Best. Kasi nazali awa mpokwa nyonso, soki olingi komona Nkolo kosala bikamwiseli, yaka bobele awa. Azali kosala yango mpokwa nyonso.”

²⁵⁸ Alobaki: “Nakolinga komona yo kobikisa moto pe batika ngai nalandela bango! Okoki kolalisa bango mpongi na makoki na yo, kasi” alobaki, “Nakolinga kotala likambo yango nsima na mobu moko!”

Nalobaki: “Ee, okoki kozua makoki ya kolandela bango, Ndeko Best.”

²⁵⁹ Alobaki: “Bobeles bino etonga ya batuntuki oyo bazanga mayele nde bondimaka makambo ya boye. Ba-Batiste bandimaka bolema ya boye te.”

²⁶⁰ Ndeko Bosworth alobaki: “Zela moke.” Alobaki: “Bato boni bazali awa, kati na póso oyo mibale ya mayangani awa, baoyo basambelaka mpenza na mangomba kitoko ya ba-Batiste oyo ya Houston awa, oyo bakoki kotalisa polele ete Nzambe na-Nguyanyonso abikisi bango na mikolo oyo Ndeko Branham azuami awa?” Pe bato koleka nkama misato batelemaki. Alobaki: “Olobi nini mpo na yango?”

²⁶¹ Alobaki: “Bazali ba-Batiste te!” Alobaki: “Moto nyonso akoki kotatola likambo soko nini, ata bongo elingi koloba te ete ezali ya solo!”

²⁶² Alobaki: “Liloba na Nzambe elobi ete ezali ya solo, pe okoki kotelemela yango te. Bato balobi ete ezali ya solo, pe okoki kowangana yango te. Boye okosala nini mpo na Yango?” Bomoni, boye.

²⁶³ Nalobaki: “Ndeko Best, nalobaka bobele oyo ezali Solo. Pe soki nalobi bosolo, Nzambe asengeli kozala nsima na Solo.” Nalobaki: “Soki Azali te. . . Soki Azali nsima na Solo te, na bongo Azali Nzambe te.” Pe nalobaki: “Ngai nabikisaka bato na nzoto te. Nabótámá na—na likabo ya komona makambo, komona yango kokokisama.” Nalobaki: “Nayebi ete bato basosolaka ngai mabe, kasi nakoki kosala eloko mosusu te bobele kokokisa bondimi ya motema na ngai.” Nalobaki: “Nandimaka ete Yesu Klisto asekwaki kati na bakufi. Pe soki Molimo oyo eyaka pe etalisaka bimononeli pe bongo na bongo, soki ntembe ezali mpo na yango, yaka epai na biso pe omona.” Nalobaki: “Esili.” Kasi nalobaki: “Kasi mpo na ngai moko, nakoki kosala eloko moko te uta na ngai moko.” Pe nalobaki: “Soki nalobi Solo, Nzambe asengeli mpo na ngai, kotatola ete Ezali Solo.”

²⁶⁴ Pe pene na ntango yango mpenza, Eloko Moko esalaki: “Wuuuusssh!” Ye wana, Akitaki mbala moko. Pe Lisanga ya Bakangi fotó ya Amerika, Studio Douglas ya Houston, na Texas, bazalaki na ekangelo monene ya fotó kuna (epekisami kokanga fotó), bakangaki fotó.

265 Na ntango oyo bazalaki wana mpo na kokanga Ndeko Best bafotó, pe ete a—alobaki, liboso ete nákóma kuna, alobaki: “Bozela moke! Bokokanga ngai bafotó motoba awa!” Alobaki: “Tokei, bokanga ngai fotó sikawa!” Pe atiaki mosapi na ye na zólo ya mobange mosantu wana, boye, alobaki: “Sikawa bokanga ngai fotó!” Pe bakangaki. Nsima akangaki ebotú pe atombolaki yango, alobaki: “Sikawa bokanga ngai fotó!” Pe bakangaki yango bongo. Nsima asalaki boye, amibongisaki mpo na fotó na ye. Alobaki: “Oyo bokomona yango na zolonale na ngai!” ndenge wana.

266 Ndeko Bosworth azalaki wana kasi alobaki eloko moko te. Nsima na yango bakangaki fotó ya Oyo.

267 Ntango bazalaki kozonga na ndako na mpokwa wana, (elenge Mokatoliko oyo akangaki fotó yango), alobaki na elenge mobali oyo mosusu, alobaki: “Okanisi nini mpo na Oyo?”

268 Alobaki: “Nayebi ete nalobaki mabe mpo na ye. Ntango limeú wana elimwaki na kingo ya mwasi wana, nalobaki ete alalisaki ye mpongi.” Alobaki: “Ekoki kozala ete nasalaki libunga na ntina na yango.”

Alobaki: “Okanisi nini mpo na fotó wana?”

“Nayebi te.”

269 Bazindisaki yango na asíde. Fotó oyo akangaki yango oyo, bokoki kotuna ye soki bolingi. Bazongaki na ndako, afandaki wana pe amelaki likaya. Akotaki kuna pe abimisaki fotó moko ya Ndeko Bosworth, ezalaki zábulu ya fotó. Abimisaki mibale, misato, minei, mitano, motoba, pe nyonso ezalaki na eloko moko te. Nzambe apesaki nzela te ete bakanga mobange mosantu na Ye fotó mpembeni na mokíbisi wana, na ntango oyo azalaki koningisa zólo na ye, to, loboko, ebotú na ye na nse na zólo na ye boye. Apesaki yango nzela te.

270 Babimisaki oyo elandaki, pe Yango wana. Mobali wana akweyaki na mpasi ya motema na butu wana, ndenge balobaki.

271 Pe batindaki zabulu ya fotó oyo na Washington, D.C. Babatelaki yango na mobeko pe bazongisaki yango.

272 Pe George J. Lacy, mokonzi ya F.B.I. na mosala ya bilembo ya misapi pe mikanda, pe bongo na bongo, moko kati na baoyo baleki na mayele na mokili mobimba, bamemelaki ye yango pe asalaki na yango mikolo mibale mpo na komeka kotala ekangelo ya fotó yango, bapole, pe nyonso mosusu. Pe ntango tokómaki na nsima na nzánga wana, alobaki: “Reverend Branham, ngai pe, nalobaki mabe mpo na yo.” Alobaki: “Pe nalobaki ete ezalaki nde botangi ya makanisi, moto moko alobaki ete bamonaki Bapole yango pe makambo ya lolenge wana.” Alobaki: “Oyebi, mobange mokíbisi wana azalaki ntango nyonso koloba bongo,” (alingaki koloba mozangi kondima wana) “bafotó wana zongazonga, libúngútulú ya pole wana zongazonga na Klisto, zongazonga

na basantu,’ alobaki, ‘ezalaki na yango bobele likambo ya makanisi.’” Kasi alobaki: “Reverend Branham, líso ya masini oyo ekangaka fotó ekoki kokanga likanisi fotó te! Pole ebetaki talatala ya ekangelo, to, ebetaki zábulu ya fotó, pe Yango emonanaki.” Pe alobaki . . .

²⁷³ Napesaki bango mokumba wana. Alobaki: “Oo, misie, oyebi motuya na yango?”

Pe nalobaki: “Mpo na ngai te, ndeko, mpo na ngai te.” Na bongo alobaki . . .

²⁷⁴ “Na ntembe te, yango ekosalema soko moke te wana ozali na bomoi, kasi mokolo moko, soki bompenzá ekokoba kokende liboso pe soki Boklisto ekokoba kozala, eloko moko ekosalema mpo na likambo oyo.”

²⁷⁵ Na bongo, baninga, na mpokwa oyo, soki oyo nde liyangani na biso ya suka na mokili oyo, ngai na bino tozuami Liboso na Nzambe na-Nguya-nyonso. Litatoli na ngai ezali solo. Makambo ezali ebele, ebele, ekosengela na babuku mingi mpo na kokoma yango, kasi nalingi ete boyeba.

²⁷⁶ Bato boni bazali awa oyo basila komona, fotó te, kasi Pole Yango moko mpembeni na esika oyo nazalaki koteya? Botombola maboko, na eyanganelo mobimba, moto nyonso oyo asila komona Yango. Bomoni, pene na maboko mwambe to zomi kati na baoyo bazali awa.

²⁷⁷ Okoloba: “Ekoki—ekoki kosalema ete bango bamona Yango bongo ngai nazanga komona Yango?” Iyo, misie.

²⁷⁸ Monzoto oyo—oyo bato na mayele bazalaki kolanda, elekaki likolo na bisika nyonso oyo batalaka minzoto. Ata moto moko amonaki Yango te, bobele bango. Bobele bango nde bamonaki Yango.

²⁷⁹ Eliya azalaki wana, azalaki kotala makalo na móto nyonso wana, pe nyonso oyo etikali. Pe Gehazi atambwisaki miso, akokaki komona yango ata na esika moko te. Nzambe alobaki: “Fungola miso na ye ete amona.” Pe amonaki yango, bomoni. Kasi azalaki mwana malamau, azalaki wana pe azalaki kotambwisa miso, kasi akokaki komona yango te. Ya solo. Epesameli na bamoko ete bamona, kasi na bamosusu te. Ezali ya solo.

²⁸⁰ Kasi sikawa bino baoyo naino bomona Yango te, naino bomona Yango te, pe bino baoyo bosila komona Yango mpenza na miso na bino ya bomoto kasi naino bomona fotó te, nzoka nde baoyo bamoni fotó bazali na ndanga monene koleka bino baoyo bosila komona Yango na miso na bino ya bomoto. Mpamba te bino, na miso na bino ya bomoto, bokokaki kosala libunga, miso na bino ekokaki kokosama. Boye te? Kasi Yango ezali kokosama ya miso te, Yango ezali Solo, boluki ya zébi etalisi ete Ezali Solo. Boye Nkolo Yesu nde asali yango.

“Na bongo, Ndeko Branham,” okoloba, “yo okanisi ete Yango ezali nini?”

²⁸¹ Nandimi ete Ezali se Likonzi na Mító yango moko oyo ekambáká bana na Yisalaele longwa na Ezipito kino na Palestina. Nandimi ete Ezali se Mwanje na Pole yango moko oyo akotaki na—na boloko pe akendeki kosimba Santu Petelo, akendeki kofungola ekuke pe abimisaki ye libanda epai pole ezalaki. Nandimi ete Ezali Yesu Klisto, motindo moko lobi, lelo, pe libela na libela. Amen! Azali se Yesu moko wana lelo oyo Azalaki lobi. Akozala libela na libela se Yesu moko wana.

²⁸² Na ntango oyo nazali koloba na ntina na Yango, Pole yango moko oyo ezali na fotó wana ezali . . . ezuami mpembeni na esika oyo natelemi sikawa, ata pids mibale [0,6 metre—N.D.T.] ekoki te. Ya solo. Nazali komona Yango te na—na miso na ngai, kasi nayebi ete Ezali awa. Nayebi ete Ezali komitia kati na ngai sikawa. Oo! Soki bokokaki bobele koyeba bokeseni oyo ezalaka ntango nguya na Nzambe na-Nguya-nyonso ekotaka na mosala, pe ndenge makambo ebongwanaka!

²⁸³ Ezali mondenge, ata nani. Nazalaki na likanisi ya kobondela mpo na babeli te, nazalaki na likanisi ya komibulisa lisusu. Kasi emononeli ezali awa likolo na mitó ya bato. Iyo. Nzambe ayebi yango. Nakosala molongo ya mabondeli te, nakotika bino bofandi wana. Boni kati na bino bazali na kalati ya mabondeli te? Botombola maboko, moto oyo azali na kalati ya mabondeli te, azali na kalati ya mabondeli te.

²⁸⁴ Mwasi moindo oyo afandi awa, namoni ete otombolaki maboko. Ezali boye? Telema naino mwa moke mpo namona yo malam. Nayebi oyo Molimo Mosantu akoloba te, kasi ozali kotala ngai na bosembo nyonso. Ozali na kalati ya mabondeli te? Soki Nzambe na-Nguya-nyonso amonisi ngai likambo na yo . . . Nazali kosala boye bobele mpo na ebandeli, bobele mpo na kobanda. Ondimi ete ngai nazali . . . Oyebi ete eloko moko ezali te . . . ete eloko ata moko ya malam ezali te kati na ngai. Soki obálá, naleki mobali na yo na eloko moko te. Nazali bobele moto. Kasi Yesu Klisto nde Mwana na Nzambe, pe Atindaki Molimo na Ye mpo na kotatola makambo oyo.

²⁸⁵ Soki Nzambe ayebisi ngai oyo ezali kotambola te epai na yo (pe oyebi ete nzela ata moko ezali te mpo ete nakota na boyokani na yo), okondima na motema na yo mobimba? [Ndeko mwasi abakisi maloba—N.D.E.] Nzambe apambola yo. Na bongo bokono na yo ya ipertension esili. Yango nde ozalaki kobela. Ezalaki mpenza yango, boye te? Na bongo fanda.

²⁸⁶ Ndima yango naino mbala moko! Napesi mitindo na moto nyonso ete andima Yango.

²⁸⁷ Tala, nakoyebisa bino likambo moko. Malata, ntango ayaki epai na Nkolo Yesu. Likabo wana elingaki kosala soko moke te . . . Wana Tata asilaki kotalisa Ye likambo oyo Alingaki kosala.

Elingaki kosala soko moke te. Kasi alobaki: “Nkolo, na . . . Soko ozalaki awa, mbele ndeko na ngai akufi te.” Alobaki: “Sasaipi pe nayebi ete, likambo nini lilombi Yo epai na Nzambe, Nzambe akopesa Yo yango.”

²⁸⁸ Alobaki: “Ngai nazali Lisekwa pe Bomoi, ye oyo azali kondima Ngai, ata asili kokufa, akobika. Pe moto na moto oyo azali na bomoi pe andimi Ngai, libela akokufa te. Ozali kondima oyo?”

²⁸⁹ Boyoka oyo alobaki. Alobaki: “Ee, Nkolo. Nazali kondima ete nyonso oyo Olobi ezali Solo. Nazali kondima ete Yo ozali Mwana na Nzambe oyo asengelaki koya na mokili.” Ezalaki lolenge na ye mpo na kobeleva, na komikitisa.

Okómi komiyoka ndenge mosusu, boye te, madame? Iyo. Ezali ya solo.

²⁹⁰ Mama moke oyo afandi wana, wana penepene na yo, ye pe, azali kobela mingai pe bokono ya basi. Ezali boye te, madame? Telema mwa moke, mama moke oyo alati mokoto ya motane. Ozalaki mpenza pene na lolenge ete emononeli ekómi epai na yo. Mingai, bokono ya basi. Ezali bongo? Pe likambo oyo ezali na bomoi na yo (ozali na—ozali na etaleli moko ya kitoko pe ya bosembo): ozali na mitungisi mingi na bomoi na yo, makambo mingi. Pe makambo yango etali molingami na yo, ezali nde mobali na yo. Azali molangwi. Alingaka kokende na ndakonzambe te. Soki ezali ya solo, tombola loboko. Nzambe apambola yo, madame. Zonga na ndako sikawa pe yamba lipamboli na yo. Obikisami, pole ekómi zongazonga na yo.

²⁹¹ Mobali oyo afandi wana mpembeni na ye. Yo, misie, ondimi? [Ndeko alobi: Iyo. Nandimi.”—N.D.E.] Na motema na yo mobimba? [Iyo, misie.”] Eyokeli na yo moko ezali ya kokufa. Ezali eyokeli ya koyoka solo. Ezali bongo te? Soki ezali bongo, pepa loboko na yo. [“Ezali bongo.”] Tombola loboko na yo na monoko na yo, *boye*, loba: “Nkolo Yesu, nandimi Yo na motema na ngai mobimba.” [“Nkolo Yesu, nandimi Yo na motema na ngai mobimba.”] Nzambe apambola yo. Kende sikawa. Okozua lobiko na yo.

²⁹² Bozala na kondima epai na Nzambe! Bino nyonso bokanisi nini mpo na Yango, bino kuna na nsima? Bozali kondima? Bozala na limemia!

²⁹³ Mwasi moko afandi kuna na nsima, na litúmu. Nazali komona Pole wana likolo na ye. Yango nde nzela bobele moko oyo nakoki koyeba likambo, na nzela na Pole wana oyo eteleli likolo. Pole *oyo* eteleli awa likolo ya mwasi yango. Ekoki kosalema bobele na mwa ntango moke, soki nakoki komona oyo yango ezali. Eko . . . Mwasi yango azali na bokono ya—ya motema. Azali kotala sémba epai na ngai.

²⁹⁴ Pe mobali na ye afandi mpembeni na ye. Mobali na ye azali na bokono moko boye, azali kobela, kotungisama, bokono.

Ezali boye te, misie? Tombola maboko soki ezali solo. Ezali bongo, ezali nde yo, madame, oyo olati mwa litambála, wana. Misie wana, ezali boye te? Otungisami mwa moke te lelo? Ozali kotungisama na líkundú, mobali. Ezali bongo.

²⁹⁵ Bino nyonso bondimi na motema mobimba, bino mibale? Boyambi Yango? Misie, yoka, yo pe, nazali komona yo otomboli loboko, omelaka makaya. Tika kosala bongo. Omelaka likaya ya monene, osengelaki kosala bongo te, ezali kopesa yo bokono. Ezali bongo te? Soki ezali bongo, pepa loboko boye. Yango nde ezali kotungisa yo. Ezali mabe mpo na misisa na yo. Bwaka biloko ya mbindo pe kosala yango lisusu te, pe okobikisama na yango, okokóma malamú, pe bokono ya motema ya mwasi na yo ekosila. Ondimi yango? Ezali bongo te? Nazali komona yo te uta awa, pe oyebi yango, kasi ozali na makaya ya minene na . . . na—na líbenga na yo ya liboso. Ya solo. Bimisa yango pe tia loboko likolo na mwasi na yo, yebisa Nzambe ete okomama lisusu biloko ya boye te, okozonga na ndako na nzoto malamú, yo na mwasi na yo bokokóma kólóngónú. Nkombo na Nkolo Yesu epambolama!

Bozali kondima na motema mobimba?

²⁹⁶ Mama moke oyo afandi awa pe azali kotala ngai awa. Yo na . . .kuna, oyo afandi na kiti ya liboso awa, oyo afandi awa mpenza. Mama moke na . . .oyo azali kotala ngai, oyo afandi wana. O . . .Ozali na kalati ya mabondeli, madame, oyo awa? Ozali na kalati ya mabondeli te? Ozali kondima na motema na yo mobimba? Ondimi ete Yesu Klisto akoki kopesa yo bokólóngónú?

²⁹⁷ Okanisi nini mpo na Yango, yo oyo ofandi mpembeni na ye? Ozali na kalati ya mabondeli, madame? Ozali na yango te? Yo pe olingi kozala na nzoto kolóngónú? Okosepela kozongela kolia ndenge omeseneki, boye te, kozanga mpasi na líkundú? Ondimi ete Yesu abikisi yo sikawa? Telema soki ondimi ete Yesu Klisto abikisi yo. Ozalaki na mpota monene na líkundú na yo, boye te? Eutaka na motema mokuse. Ozalaka na motema mokuse banda kala. Koleka mingi aside pe nyonso wana, to, nalingaki koloba ete ebotaka aside, pe esalaka mino ngai soki biloko ezongeli yo na monoko. Ya solo. Iyo, misie. Ezali mpota monene na líkundú, ezalaki na líkundú na yo na nse. Esalaka mpasi mbala mosusu nsima na yo kolia koleka mingi lipa ya kotumba na mateka. Ezali bongo? Nazali kotanga makanisi na yo te, kasi Molimo Mosantu amikosaka te. Obikisami sikawa. Zonga na ndako, zala na nzoto kolóngónú.

²⁹⁸ Bongo bino kuna na ngambo oyo? Bamosusu kati na bino kuna oyo bazali na kalati ya mabondeli te, botombola maboko. Moto oyo azali na kalati ya mabondeli te. Malamú, bozala na limemia, bondima na motema mobimba. Bongo bino kuna na balkon? Bozala na kondima epai na Nzambe.

²⁹⁹ Nakoki kosala makambo oyo ngai moko te, ezali bobele ngolu na Ye oyo ezangi ndelo. Bondimi? Nakoki koloba yango bobele na ntango Azali komonisa ngai yango. Na ntango oyo kondima na bino . . . Nazali koloba boye mpo naningisa kondima na bino, nsima nakotala soki Akokamba ngai na nzela nini. Bososoli ete oyo—oyo ezali likambo na ndeko na bino te? Bozuami liboso na Ye. Ngai nde nazali kosala likambo oyo te, kondima na bino nde ezali kotia Yango na mosala. Ngai nakoki kotia Yango na mosala te. Kondima na bino nde ezali kosala yango. Nazali ata na lolenge moko te ya kotia yango na mosala. Bozela moke.

³⁰⁰ Na litúmu oyo namoni moto moindo moko afandi wana, azali mwa mobange, alati matalatala. Ozali na kalati ya mabondeli, misie? Telema mwa moke. Ondimi ete nazali mosaleli na Nzambe, na motema na yo mobimba? Ozali kokanisa moto mosusu, boye te? Soki ezali bongo, pepa loboko na yo. Ezali na ntina na ngai ndeko na bino te. Sikawa, ozali na kalati ya mabondeli te. Olingaki kozala na makoki ya kokota na molongo te, mpamba te ozali na kalati ya mabondeli te. Sikawa, soki bamoko kati na bino bazali na bakalati ya mabondeli, bo—bo—botelema te, bomoni, mpo ete bokozua libaku ya kokota na molongo.

³⁰¹ Kasi namoni Pole yango kotelema mpenza likolo na ye. Emononeli naino eyei te. Nakoki kobikisa yo te, ndeko mobali, nakoki te. Bobele Nzambe nde akoki kosala yango. Kasi ya yo . . . yo . . . ozali na kondima. Ozali kondima. Pe eloko—eloko moko ezali, oyo—oyo esali ete yango ezala, na lolenge moko boye.


³⁰² Soki Nzambe na-Nguya-nyonso ayebisi mobali oyo motungisi na ye ezali nini, bino nyonso bokoyamba kobikisama na bino? Mobali moko, azuami mpenza na ntaka ya metele zomi to zomi na mitano liboso na ngai, namóná naino ye te na bomoi na ngai. Azali bobele moto oyo azali wana. Soki Nzambe na-Nguya-nyonso amonisi oyo ezali kotambola te epai na mobali yango, moko na moko na bino asengeli kobima awa na nzoto kolóngónú. Nzambe akoki lisusu kosala nini? Boye te?

³⁰³ Misie, eloko moko ya mabe ezali te epai na yo. Ozali na bolembu, ozali kolamuka mwa mingi na butu, kolemba-lemba pe bongo na bongo, kasi yango te ezali kopesa yo mitungisi. Mitungisi na yo etali nde mwana na yo ya mobali. Pe mwana na yo azali kati na lopitalo moko boye ya letá, pe azali na bokono ya bomoto mibale. Boye te? Pepa loboko na yo soki ezali bongo. Ezali mpenza bongo.

³⁰⁴ Boni bandimi sikawa ete Yesu Klisto Mwana na Nzambe azali awa? Totelema, topesa Ye nkembo pe toyamba kobikisama na biso.

³⁰⁵ Nzambe na-Nguya-nyonso, Mobandisi na Bomoi, Mopesi na makabo nyonso malamú, Ozali awa, Nkolo Yesu Klisto moko wana, ndenge moko lobi, lelo, pe libela na libela.

³⁰⁶ Pe, Satana, okosi bato oyo ntango molai, bima kati na bango! Napesi yo mitindo na nzela na Nzambe na bomoi Oyo Azali awa sikawa na lolenge ya Likonzi na Móto, tika bato oyo! Pe bima kati na bango, na Nkombo na Yesu Klisto!

³⁰⁷ Moko na moko na bino, botombola maboko pe bopesa nkembo na Nzambe, pe boyamba kobikisama na bino, moko na moko. [Eyanganelo bapesi nkembo na Nzambe—N.D.E.] 

LOLENGE OYO MWANJE AYAKI EPAI
NA NGAI, PE ETINDA NA YE LIN55-0117
(How The Angel Came To Me, And His Commission)

Mobimba ya liteya oyo ya Ndeko William Marrion Branham eteyamaki mokolo ya yambo na mpokwa ya 17 Sanza ya yambo na mobu 1955, na Ecole Secondaire Lane Tech na Chicago, Illinois, U.S.A. Liteya yango likolo na bande, motango 55-0117, ebengami Lolenge Mwanje Ayaki Epai Na Ngai, Pe Etinda Na Ye, ezali na ngonga moko na miníti ntuku misato na mibale. Tosali nyonso mpo tózua Nsango oyo eteyamaki longwa na bande pe tokomí yango na lokasa. Buku oyo esalemi pe ekabolami na Voice of God Recordings.

LINGALA

©2012 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiamana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org